





鴻苞集卷之三

明東海屠隆緯真著

西吳茅元儀公選訂

閔國珍聘之校

九州風土

以九州風土大較言之西北土厚風勁故其民敦
樸而剛直椎魯而少文東南土秀風弱故其民文
物而輕清軟猾而多智然地氣南北亦有轉移今
東南吳越間顧有椎戇之氣西北秦晉間不少圜

轉之風似與古昔差異豈所謂自南而北乎所貴
賢者以學問勝之

輿圖要略上

九州廣矣圖志浩繁不能悉舉古今人往往因其繁而遺其要厭其小而忘其大神州赤縣疆域茫然見古郡國邑里山川之名不知爲卽今之何地見今郡國邑里山川之域不知爲卽古之何名人恒苦之及取圖志考之繁雜冗瑣又未免望洋之歎夫煩猥易忘泛漫非要不能舉之亦已矣要且大者而茫然烏稱博雅君子哉余考輿圖泛而不要者無暇悉載惟取先王疆理郡國邑里形勝阨

塞要害名山大川洞天福地古今聖賢名人誕育
之鄉帝王霸主興建之國英雄豪傑經營之地良
將猛士戰爭之場忠臣遷客流播之士賢臣循吏
過化之區至人仙釋修煉之都遁世隱逸幽棲之
境莫不拈而出之經史之所稱某都某國某郡某
邑某山某川卽今之某某今人之所稱某都某國
某郡某邑某山某川卽經史之某某莫不拈而出
之悉如指掌焉世之圖志多至千百卷余僅以一
卷括之而要略皆在是余之所爲纂輯也散之千

百卷中則難尋括之一卷則易舉卽如一大都會
某聖賢生于斯某帝王湯沐建都于斯某豪傑經
營于斯某將帥戰陳于斯某忠賢遷播于斯某循
良惠澤于斯某仙釋修煉于斯某高人棲隱于斯
某山川最勝某都邑最鉅某形勝最重大某關津
最險要某城市宮殿臺榭最古某沿革興廢存沒
最多如此足矣他山川地里之無大關要者雖遺
而不舉何害或曰圖志惟其散漫是以山川地里
易忘難舉而貴博洽之士今輯略纂要人人舉之

則博洽廢矣曰嗟乎余猶思人之并此一卷置而
不覽也覽而悉舉其要人人博洽也則余又何必
獨擅而以詫人哉余之不取獨擅而以詫人盖非
獨此一端矣作輿圖要略

北京古幽薊之地天文尾箕分野遼金元雖嘗建
都於此然皆以夷狄入中國不足以當王氣占形
勝至我太宗文皇帝建都始足稱萬世鴻基

順天府禹貢冀州之域天文尾箕分野高陽氏謂
之幽陵陶唐曰幽都虞爲幽州夏殷省幽入冀又

爲冀州地周復置幽州武王封堯後于薊封召公奭于燕卽此秦爲上谷漁陽二郡歷晉後周唐開元間爲范陽幽州南百二十里有涿河合范河東流入海故名范陽陳勝武臣擊范陽卽此邑有密雲乃古檀州有白檀山故名遵化縣玉田縣爲古無終國項羽立燕王廣爲遼東王都無終卽此廣都乃玉田縣涿州卽古涿鹿居庸關在順天府北一百二十里北枕沙漠南拱京師古北口在密雲東北一百二十里關外卽沙漠地大喜峯口在遵

化北亦接沙漠皆要害口黃金臺在府東南一十六里燕昭王築以延賢士

保定府禹貢冀州之域天文尾箕兼昴畢分野戰國時屬趙秦爲上谷鉅鹿二郡地慶都縣乃堯葬母地堯始受封于此後魏爲樂浪北平上谷郡地易水在安州城北燕太子送荆軻至易水卽此易州亦以此水得名紫荆關在易州城西八十里倒馬關在唐縣西北

河間府禹貢冀州之域天文箕尾分野秦爲鉅鹿

上谷二郡地河間縣周爲唐叔封邑獻縣卽漢景
帝子河間獻王封國交河縣以潯沱高河二水交
流故名平津鄉在滄州鹽山縣界南漢公孫弘封
平津侯于此南皮縣在滄州袁尚攻袁譚譚敗兵
還南皮

真定府禹貢冀州之域天文畢昴分野周爲并州
地漢初置恒山郡井陘在府城西南一百五十里
冀州屬真定秦漢爲信都國張耳陳餘立趙歇爲
王居信都卽此真定面臨潯水背倚恒山左接滄

海右抵太行恒山在曲陽縣西北一百四十里爲
北岳真定有高邑縣春秋時名鄆燕平王使栗腹
將而攻鄆漢光武卽位于鄆南改曰高邑屬趙郡
順德府禹貢冀州之域天文昴分野周時爲邢國
地後屬晉戰國屬趙項羽改襄國按羽立張耳爲
常山王王趙地治襄國卽此秦名鉅鹿晉時爲石
勒所據石虎改置襄國郡唐初爲邢州唐山縣春
秋時晉栢人邑堯所都漢高祖過栢人不宿而去
卽此沙丘在平鄉縣秦始皇東巡回崩于沙丘卽

此處襄國以趙襄子得名

廣平府禹貢冀州之域天文昴分野戰國屬趙卽邯鄲地後周及唐初爲洛州漳河源出河南磁州西山流經廣平入洛河叢臺在邯鄲縣北趙武靈王所築呂翁以仙枕授盧生于邯鄲逆旅炊黃梁卽此邯鄲故趙都

大名府禹貢冀兗二州之域天文室壁分野本商舊都春秋爲晉地戰國爲魏衛二國之境漢置魏郡唐號天雄軍元城縣春秋時沙麓地春秋沙麓

山崩卽此滑縣本古豕韋氏之國晉爲濮陽國地
古顓頊都故又謂之帝丘白馬津在縣治南關公
斬顏良于白馬解袁紹圍卽此又縣東二十里有
延津袁紹軍次延津與操軍相持操破紹軍斬文
醜于此濬縣西七十里商紂所都爲朝歌南有糟
丘酒池澶淵城在開州城南五里春秋會盟于澶
淵宋真宗退契丹于澶淵卽此馬陵道在府城東
南十里卽孫臏伏弩殺龐涓處瓠子口在開州城
西南二十五里卽漢武帝築隄沉白馬玉壁作歌

築宮其上名宣房宮處枋頭在濬縣西南八十五里晉桓溫攻慕容垂敗于枋頭卽此

永平府東至山海關一百八十里與遼東接界出關卽遼東路古恒稱遼西遼東入山海關以北幽州永平遼西也出山海關以東玄菟樂浪遼東也禹貢冀州之域天文尾分野初虞分冀州東北爲營州卽其地商爲孤竹國夷齊所讓國也周屬幽州春秋時爲山戎肥子二國地秦爲遼西右北平二郡地魏改盧龍郡有盧龍塞田疇不賣盧龍塞

以取富貴卽此碣石山在其北昌黎卽營州地營
州東北有柳城田疇曰舊北平郡治在平岡道出
盧龍達於柳城軍從盧龍口越白檀之險營州柳
城北有龍山龍山之西命曰龍城慕容燕號龍山
新宮曰和龍後契丹改和龍城曰黃龍府榆關在
撫寧縣東二十里隋開皇間漢王諒將兵伐高麗
出榆關卽此山海關亦在撫寧縣東通遼東一帶
其北爲山其南爲海故名府治舊有令支縣趙石
虎拔令支取其地卽此

延慶州禹貢冀州之域天文尾分野屬上谷郡南
阻居庸北距龍門

保安州禹貢冀州之域虞爲幽州北境天文尾分
野城西北二十里有磨笄山趙襄子姊爲代王夫
人襄子殺代王夫人磨笄自殺因以名山桑乾河
在州城西南十五里唐人詩無端又渡桑乾水却
望并州是故鄉卽此也

萬全都司禹貢冀州之域天文尾分野亦上谷幽
州地宣府重鎮在焉前望京都後控沙漠左挹居

庸之險右擁雲中之固地接飛狐俗同雁門

山西冀州以西地也

太原府禹貢冀州之域天文參井分野舜初以冀州地廣分置并州後復省入冀周置并州成王封弟叔虞於此爲唐國春秋時爲晉國戰國時屬趙號晉陽又名太原又名河東曰山西者恒山以西也代州卽雁門郡雁門山在代州北三十五里雁門關以山得名關飛狐山在雁門外通沙漠五臺縣以五臺山得名山在縣東北一百四十里忻州

定襄縣漢衛青將六將軍出定襄擊匈奴卽此崙
嵐州爲樓煩胡所據趙滅樓煩以爲縣以崙嵐山
得名句注山在代州西二十五里爲太原之險
平陽府禹貢冀州之域天文觜參分野堯都平陽
卽此其地北接汾晉西連同華襄陵縣以晉襄公
陵在此因名岳陽縣卽漢上黨郡禹貢旣修太原
至于岳陽卽此曲沃縣晉文侯弟成師封曲沃卽
此蒲州卽蒲坂舜都解州春秋爲晉之解梁滎河
縣戰國時爲魏汾陰地漢置汾陰縣縣北十里有

后土廟漢武帝立后土祠于汾陰雕上躬祠后土

雕音誰高土堆也

安邑縣卽禹都中條山在蒲州

東南十五里跨平陸芮城安邑夏縣解州境首陽

山在蒲州東南三十里伯夷叔齊采薇之處歷山

在蒲州南一百里卽舜畊處龍門山在河津縣西

北三十里卽禹鑿通黃河處箕山在平陸縣東北

九十里許由隱處九原山在絳州西北二十里趙

文子與叔向觀于九原卽此太行山在絳縣東二

十里山極高險而綿亘甚長西北諸山多其支脉

霍山在霍州東南三十里周爲冀州之鎮介山在
靈石縣東三十里介之推隱處壺口山在吉州西
七十里禹貢旣載壺口卽此孟門山在吉州西七
十里呂不韋曰龍門未闢河出孟門之上卽此砥
柱峰在平陸縣東南五十里黃河中流其形如柱
禹鑿底柱以通河流王官谷在臨晉縣東南七十
里唐司空圖隱此乃中條山谷也汾河沁河平水
晉水絳水涑水皆在平陽以平水之陽得名
大同府禹貢冀州之域虞周屬并州天文昴畢分

野戰國屬趙秦爲雲中雁門代郡地白登山在府城東七里上有白登臺漢高帝爲匈奴冒頓所圍卽此紇真山亦名紇干山在府城東北五十里其山冬夏積雪故諺曰紇干山頭凍殺雀何不飛去生處樂北岳恒山在渾源州南二十里雁門關在馬邑縣東南七十里馬邑城在朔州東廣武城在馬邑縣南八十里漢高帝封韓王信太原治馬邑後與匈奴屯廣武卽此舊有五原縣今廢所謂雲中五原也飛狐道在廣昌縣漢酈食其說高祖塞

飛狐之口卽此

汾州禹貢冀州之域天文參分野晉爲西河又名
汾陽介山在介休縣東南二十里地名綿上介之
推與毋偕隱處東漢郭泰介休人蔡邕郭有道碑
在

遼州與河南彰德府磁州武安縣接壤禹貢冀州
之域天文參井分野屬上黨郡

沁州禹貢冀州之域以沁水得名亦晉地石勒武
鄉人

潞州禹貢冀州之域天文參井分野商時爲黎國
書曰西伯戡黎卽此秦名上黨羊腸坂在壺關縣
東南一百六里坂長三里盤曲如羊腸長平關在
長子縣南四十里卽秦白起坑趙卒四十萬處

澤州禹貢冀州之域天文觜參分野名高都又名
長平太行山在州城南三十里自此東西一帶諸
山雖各因地立名其實皆太行也

陝西

西安府東至山西蒲州黃河界禹貢雍州之域天

文井鬼分野又爲鶉首之次周爲王畿地秦置內
史漢武帝改京兆尹與左馮翊右扶風爲三輔晉
後爲劉石姚苻所據所謂四塞之國被山帶河金
城千里天府之國總名秦地名關中關中者以函
谷關得名也長安縣附郭秦因古地名曰長安咸
陽縣在府城西其地在山南水北山水皆陽故名
咸陽臨潼縣以潼水爲名涇陽縣以涇水爲名渭
南縣以渭水得名韓使水工鄭國爲秦鑿涇水爲
渠卽此涇水藍田縣以山出玉名藍田縣山曲曰

盤水曲曰屋故得名商縣古商於地華州華陰縣
並以華山得名武功縣以武功山得名邠州卽古
豳國公劉所居也龍首山在府城北十里首入渭
水尾達樊川選詩龍首秋雲飛終南山在府城南
五十里太一山在終南山南二十里王維詩云太
一近天都驪山在臨潼縣東南二里因驪戎所居
故名山之麓有溫泉唐玄宗嘗幸此地甘泉山在
涇陽縣西北一百二十里甘泉所出漢甘泉宮在
其上單于侵漢烽火達甘泉卽此商洛山在商縣

東南九十里卽四皓隱處太華山在華陰縣南十里卽西岳也少華山在華州南東連太華潼關在華陰縣東南與河南閩鄉縣界元名衝門言河自龍門南流衝激華山而東後因潼水更名自長安東一百八十里出華州華陰縣爲潼關自潼關東二百里至陝州靈寶縣爲秦舊函谷關自靈寶三百餘里至河南府新安縣則漢新函谷關也倒獸山晉王嘉子年隱處亦名玄象山在渭南縣東南三十七里土門山在耀州城東南四里中斷如門

杜甫詩北上惟土門連天走窮谷奉天城在乾州
唐德宗從桑道茂之言築此城及朱泚亂果幸焉
梁山在乾州城西北五里古公單父去邠踰梁山
至岐下卽此太白山在武功縣南九十里武功山
在武功縣南一百里杜甫詩遙瞻太白雪喜遇武
功天子午谷在府城南一百里秦嶺在藍田縣界
唐韓愈所謂雲橫秦嶺家何在卽此王維輞川在
藍田縣西南有孟城坳華子岡茱萸泝辛夷塢木
蘭砦鹿柴等二十餘景樂遊原在府城南八里漢

宣帝起樂遊廟在曲江北唐詩樂遊原上望昭陵
細柳原在昆明池南卽漢周亞夫屯兵處始平原
在興平縣北漢富人袁廣漢於此築園後徙入上
林苑五丈原在武功縣西南七十里卽漢諸葛亮
屯兵處馬嵬坡在興平縣西二十五里唐楊貴妃
葬處鴻門坡在臨潼縣東七十里卽漢高帝會項
羽處有渭河涇河洛河漆河沮河澧水鎬水滻水
灊水樊川乃漢樊噲食邑地蘭池在咸陽秦始皇
引渭水爲長池築爲蓬萊山刻石爲鯨魚漢太液

池在建章宮北曲江池在府城東南一十里漢武帝所鑿唐爲燕會臣僚遊賞勝處昆明池在漢上林苑武帝欲伐昆明穿此池以習水戰影娥池漢武帝所鑿以玩月使宮娥乘舟以弄月影故名皇子陂在府城西南漢陂在鄠縣西三輔黃圖漢諸宮殿盡在此地潼關在華陰縣東西十里爲東北要地子午關在子午谷中漢平帝置藍田關在藍田縣東南九十八里本秦嶢關沛公引兵繞嶢關擊秦軍卽此駱谷關在盩厔縣西南一百二十里

南通漢中漢將姜維出駱谷圍長安卽此穆陵關
在永壽縣南四里漢有五陵高惠文景武帝陵五
時祀五帝枌榆社在臨潼縣東北十五里漢高祖
初起禱于社神韋曲在樊川杜曲在府城南

鳳翔府禹貢雍州之域天文井鬼分野周爲岐周
地漢武帝更名右扶風與京兆左馮翊爲三輔地
有隴山故名隴州有汧水故又名汧陽總名汧隴
隴州有關山多鸚鵡和尚原在寶雞縣西南三十
五里大散關東宋吳玠大破金人於此三時原在

扶風縣南二十里東連武功縣界史記秦文公作
鄜時宣公作密時靈公又作吳陽上時於此蟠溪
在寶鷄縣東南八十里周太公所居橐泉宮在郿
縣東南本名祈年宮秦惠公所居孝公更名橐泉
穆公葬其地後人又於此建祈年觀九成宮在麟
遊縣西五里本隋仁壽宮唐太宗修以避暑更名
九成宮回中宮在隴州西北一百十里秦建漢文
帝時匈奴入蕭關燒回中宮卽此隴關在隴州西
七十里大散關在寶鷄縣南五十二里通褒斜大

路斜谷關在郿縣西南三十里谷之南口曰褒北
口曰斜卽蜀漢諸葛亮出師處此地與蜀通

漢中府西至四川保寧府廣元縣界南至保寧府
巴縣界禹貢梁雍二州之域天文井鬼翼軫分野
東界與湖廣接壤秦置漢中郡漢高祖初爲漢王
都南鄭卽此秦蜀咽喉之地舊隸蜀今更隸關陝
褒谷在褒城縣東北十里出連雲棧直抵斜谷北
口曰斜南口曰褒長四百餘里谷間褒水所經漢
張良說高祖燒絕棧道曹操出斜谷諸葛亮由斜

谷取郿皆此道也陽平關在褒中縣西北曹操伐張魯軍至陽平卽此金牛峽在沔縣西一百七十里一名五丁峽秦惠王詐爲五石牛糞金蜀王令五丁開道取金秦因使張儀司馬錯引兵滅蜀卽此定軍山沔縣東南十里兩峰對峙漢昭烈於此山下作營斬魏將夏侯淵山下諸葛亮作八陣圖平涼府禹貢雍州之域天文井鬼分野春秋爲朝那故地地有涇水故名涇原又名安定涇原環慶之間外邊羗夏左控五原右帶蘭會黃流在其北

崆峒在其南控制西垂要地崆峒山在府城西三十里廣成子所居黃帝就而問道回中山在涇州西五里上有王母宮漢武帝幸雍道回中遂北出蕭關朝那湫在開城縣有神龍涇陽亦有龍湫蕭關在鎮原縣西北一百四十里漢文帝時匈奴入蕭關唐人詩夫戍蕭關妾住吳卽此古密國在靈臺縣周文王伐密史記周共王遊涇丘密康公從卽此薛舉城在涇州東北十里唐破薛舉於此潛夫王符皇甫規俱安定人

鞏昌府禹貢雍州之域天文并鬼分野秦屬隴西
漢名天水東漢名漢陽西傾朱圉鳥鼠諸山稱雄
接壤羗戎通道隴蜀嶓冢山在秦州西南六十里
禹貢嶓冢導漾東流爲漢嶓冢山有二一在天水
郡之上邽一在漢中之金牛在天水者西漢水之
所出也渭水在府城北五里源出臨洮府渭源縣
禹貢導渭自鳥鼠同穴是也天水湖在秦州南七
里其水冬夏無增減故名天水紫水在階州境漢
封璽書用武都紫泥卽此水之泥也漢趙充國隴

西上邽人李廣隴西成紀人蜀姜維天水人唐李
賀隴西成紀人

臨洮府禹貢雍州之域天文井鬼分野秦置隴西
晉析狄道漢時匈奴寇狄道卽此漢置金城郡後
爲蘭州今爲蘭縣趙充國云兵難踰度願馳至金
城圖上方畧卽此境接巴嶺臯蘭南峙黃河北繞
鳥鼠山在渭源縣西二十里渭水經其下其地鳥
與鼠同處于穴禹貢導渭自鳥鼠同穴是也臯蘭
山在蘭縣南五里山下地勢平夷可屯百萬兵漢

霍去病擊匈奴至此洮河在府城西南源出蕃地
流入本境盤東山峽中千數百里始經府城南浩
然奔放聲如萬雷唐詩前軍夜戰洮河北已報生
擒吐谷渾長城在府城北秦始皇遣蒙恬發兵三
十萬北築長城起自臨洮卽此

慶陽府禹貢雍州之域天文井鬼分野周之先不
窋所居號北豳春秋時爲義渠戎國秦號北地寧
州後魏改邠州又曰邠寧花馬池在府城北五百
里周圍四十三里與羗中馬槽亭羅等池相近

延安府禹貢雍州之域天文井鬼分野春秋時白翟所居後魏爲統萬鎮又置金明鎮又改延州取延水爲名又有鄜州總謂之鄜延又有綏德州謂之延綏秦時總名上郡疏屬山在綏德州山海經貳負之臣曰危與貳負殺竇窳帝乃梏之疏屬山桎其右足反縛兩手與髮繫之山上漢宣帝使人發上郡疏屬山於盤石室中得一人徒裸被髮反縛械一足問羣臣無知者劉向按此言以對無定河在青澗縣東十里南入黃河潰沙急流淺深不

定故名唐詩可憐無定河邊骨猶是春閨夢裡人
又云無定河邊暮笛聲赫連臺畔旅人情橋陵在
中部縣北軒轅黃帝昇仙後葬衣冠於此

寧夏衛禹貢雍州之域天文井鬼分野秦爲上郡
地漢置朔方郡卽詩城彼朔方是也晉亂赫連夏
據之夏王勃勃初姓劉改姓赫連于黑水之南命
將作大匠叱干阿利築都城名曰統萬城蒸土築
城錐入一寸卽殺匠作其城極堅唐末拓跋思恭
鎮夏州遂世據其地宋天禧間孫德明元昊相繼

據此賀蘭山東有元昊宮衛城北有靈武營城南
有靈州城唐肅宗卽位于靈武宋改翔慶軍元仍
爲靈州 本朝州廢置守禦千戶所賀蘭山在衛
城西六十里丹崖翠峯巍然峻大盤踞數百里寧
夏倚以爲固唐張仁愿爲朔方軍總管於河北築
三受降城絕虜南寇路又洮州衛岷州衛河州衛
靖虜衛並古西羌地山川險阻爲西邊要害又文
縣守禦千戶所爲陰平道秦蜀出入兵之偏僻門
戶魏鍾會伐蜀姜維請備陰平後主不從故及於

難陝西行都指揮使司爲甘州衛肅州衛山丹衛
永昌衛涼州衛鎮番衛莊浪衛西寧衛沙州衛漢
武帝時始置酒泉武威張掖等郡以斷匈奴右臂
號河西四郡晉時張軌據河西爲前涼呂光繼之
爲後涼及李暠遷酒泉號西涼沮渠蒙遜據張掖
號北涼今甘州爲張掖肅州爲酒泉涼州爲武威
又爲姑臧西寧爲西平謂之湟中唐詩殺氣繞湟
中酒泉又爲燉煌祁連山在都司城西南一百里
本名天山匈奴呼天爲祁連因名本在匈奴地界

後爲中國所奪匈奴歌曰奪我祁連山使我六畜
不蕃息奪我焉支山使我婦女無顏色焉支山在
山丹衛城東南一百二十里燉煌郡北大磧之外
有伊州唐詩一曲伊州淚萬行又名伊吾盧又名
胡盧磧崑崙山在肅州衛城西南二百五十里周
穆王於此訪西王母處磧石山在西寧衛南卽禹
貢導河之所黃河源漢張騫云河有兩源一出于
闐一出蔥嶺又河源志河源在吐蕃西鄙有泉百
餘竇地方七八十里登其旁嶺下視竇歷歷如列

星名星宿海星宿海合流而東滙爲一澤復合流
始名黃河九渡經崑崙西海在西寧衛城西三百
餘里俗呼青海又有蒲類海一名鹽澤去玉門陽
關三百餘里在火州之上又名婆悉海蔥嶺于闐
之水皆注於此弱水在甘州衛城西環合黎山東
北入東莎界禹貢導弱水至於合黎餘波入于流
沙玉門關在故瓜州西北十八里漢霍去病破走
月支開玉門關班超在西域願生入玉門關卽此
陽關在廢壽昌縣西六里唐詩西出陽關無故人

謂此居延城在甘州衛城東本匈奴地以居延水
得名居延水卽古流沙在玉門關外渥洼水在燉
煌沙州漢元鼎四年得天馬于渥洼水中作天馬
歌河西五郡塞外以北則爲韃虜以西則爲番羗
番羗者卽漢趙充國所平先零罕于等羗也地在
湟中以外流沙張掖居延沙州過無定河瓜州南
過鳴沙山其沙履之百步皆動隨風流行謂之流
沙漢張奐燉煌酒泉人段熲武威姑臧人

山東

濟南府禹貢青州之域天文尾分野古齊地濟南
者濟水以南得名臨邑濟陽長清諸邑爲濟北泰
安州以泰山得名德州古平原郡邑華不注山在
府城東北十五里下有華泉左傳齊晉戰于鞏齊
師敗績晉逐齊侯三周華不注長白山在長山縣
西南三十里抱朴子曰長白山乃泰山之副泰山
在泰安州北五里卽東岳岱宗也舜東巡狩至此
大明湖在府城內西北隅趵突泉在府城西突然
趵起故名源出山西王屋山下濟南一名歷下以

歷山得名陵縣舊名厭次漢東方朔平原厭次人
三國禰衡平原般人晉羊祐泰山平陽人

兗州府禹貢徐兗二州之域天文奎婁分野春秋
時爲魯國滋陽縣古瑕丘地曲阜縣孔子後封邑
神農少昊徙都之地武王以封周公旦是爲魯國
鄒縣周時爲邾國魯繆公改爲鄒滕縣古小邾子
國嶧縣春秋時鄆國漢爲蘭陵戰國荀卿爲蘭陵
令魚臺縣春秋時魯棠邑隱公觀魚于棠卽此曹
州古豫州之域周武王封弟振鐸于曹秦爲定陶

縣秦章邯擊破楚軍於定陶項梁死卽此汜水在
曹州西南三十里沛公卽皇帝位汜水之陽然後
西都洛陽又徙都關中濟寧州古徐州之域晉爲
任城唐李太白客任城有太白酒樓鉅野縣禹貢
太野旣潄卽此東平州春秋時爲須句國陽穀縣
春秋時齊宋江黃會于陽穀卽此郛城縣古郛子
國尼山在曲阜縣卽叔梁紇禱而生孔子處龜蒙
鳧嶧共四山黃華山在東平州金翰林學士王庭
筠卜居於此號黃華老人穀城山在東阿縣卽張

良遇黃石公處漢以魯公禮葬項羽于穀城今羽墓在故穀城縣西北三里碯礮山在東阿縣劉宋檀道濟與後魏交兵於此今城南三土堆卽唱籌量沙之所會通河在濟寧州漕運河道也

東昌府禹貢兗州之域天文危室分野秦漢爲東郡地唐爲博平聊城縣卽魯仲連射書邑濮州古顓頊之墟爲帝丘又名濮陽

青州府禹貢青州之域天文虛危分野土居少陽其色青故以名州武王封太公望于此爲齊國漢

名北海臨淄縣齊國營丘蒙陰縣魯顓臾國在蒙
山之陰故名莒州古莒子國東北據海西南距岱
東有瑯琊西有大河牛山在臨淄縣南十里景公
登牛山而流涕琅琊山在諸城縣東南一百五十
里東枕大海景公遵海而南放於琅琊卽此穆陵
關左傳齊桓公曰賜先君履南至於穆陵卽此在
臨朐縣大峴山上古有畫邑在臨淄縣西北薄姑
城在博興縣卽古薄姑氏爲侯國斟灌城在壽光
縣東春秋澆用師滅斟灌姑幕城在莒州屬琅琊

今屬沂水魯仲連齊人邯鄲原管寧俱齊朱虛人秦
王猛齊之劇人

登州府禹貢青州之域天文危分野古爲斟尋國
唐虞時爲嵎夷地禹貢嵎夷旣宅春秋時爲牟子
國蓬萊縣漢武帝於此望海中蓬萊山因築城以
爲名文登縣古不夜城後魏總名東牟又名東萊
郡之罘山在福山縣東北三十五里連文登縣界
三面瀕海秦始皇登之罘刻石紀功漢武帝亦曾
登登州四面皆海北去海五里春夏時遙見水面

有城郭市肆人馬往來若交易狀土人謂之海市
大崑崙山在寧海州一名姑餘山以麻姑於此修
道得名元王重陽真人及弟子七真亦于此修道
文登山在文登縣東二里秦始皇東巡召集文士
登此山論功頌德故名登州亦以此得名

萊州府禹貢青州之域天文尾分野古萊夷地禹
貢萊夷作牧春秋爲萊子國齊侯遷萊子于郕在
國之東故名東萊平度州卽東漢膠東膠東膠州
並取境內膠水爲名高密以密水爲名卽墨以墨

水爲名不其山在卽墨縣東南四十里鄭玄教授
此山下有草大如薤葉長尺餘號康成書帶草勞
山在卽墨縣東南六十里有大小勞二山記云泰
山雖言高不如東海勞言登陟爲勞也逢萌修道
于此田橫島在卽墨縣東北一百里四面環海去
岸二十五里五百人同死於此遼東都指揮使司
禹貢冀青二州之域天文箕尾分野秦以幽州爲
遼西營州爲遼東冀州東北爲幽州青州東北爲
營州漢武帝拓朝鮮地并割遼東屬邑置樂浪玄

菟真番臨屯四郡一名遼陽一名東平華表山在
都司城東六十里因丁令威化鶴而得名醫無間
山在廣寧衛西五里舜封十有二山以此山爲幽
州之鎮與山東接壤世人多以屬山東混同江源
出長白山北流經五國城又北合松花江東注於
海鴨綠江在都司城東五百六十里隔江卽朝鮮
國唐太宗征高麗耀兵于鴨綠水鴨綠江西北開
原城中爲三萬衛卽古黃龍府卽古肅慎國自三
萬衛北一千里自此而東分爲五國名五國城世

傳宋徽宗葬於此卽女直國逢萌管寧王烈俱避地遼東

河南古豫州地

開封府禹貢兗豫二州之域天文角亢分野春秋鄭衛陳三國之境戰國魏都於此號爲大梁秦爲三川漢爲陳畱又爲汴梁五代梁都於此號爲東京宋金爲汴京祥符縣漢爲浚儀縣杞縣夏之後封于杞尉氏縣春秋鄭大夫尉氏之邑鄆陵縣又名安陵卽春秋鄭伯克段于鄆處

歸德州古商丘湯所居亳邑陳州伏羲所都周封
舜後於此號陳胡公許州周爲許國魏改爲許昌
新鄭周封黃帝後於此本鄭武公國滎陽本鄭都
城古號國虎牢關在汜水縣六國時爲成皐後又
名洛州春秋時名虎牢東漢廢縣爲關故名虎牢
關襄城黃帝所遊七聖皆迷之地首山在襄城縣
南五里黃帝登焉具茨山在新鄭縣西南四十里
又名大隗山黃帝登此山受神圖於黃蓋童子荆
山在鈞州城西北五十里齊武帝於此采玉夷門

大梁城東門曰夷門侯羣隱處空桑城在陳留縣
伊尹生於空桑卽此傳浪城在府城北卽張良令
力士擊秦始皇處葵丘在考城縣東春秋諸侯會
盟於葵丘卽此梁園在府城東南一名梁苑漢梁
孝王遊賞之所固陵在陳州城西北項羽南走固
陵卽此古官渡城在中牟縣北曹操與袁紹相持
于官渡口卽此高陽里在許州城內荀淑所居里
關公故宅在許州一宅分爲兩院今有祠陳橋驛
在府城北宋太祖爲衆兵擁立處壽山艮岳在府

城東北隅宋徽宗築老子卽李耳苦縣人在鹿邑
縣東今屬亳州列禦寇鄭人莊周蒙人韓非韓人
張良韓人申屠蟠陳畱外黃人阮籍陳畱尉氏人
庾亮鄆陵人殷浩陳郡長平人謝安陽夏人陳搏
亳州真源人

彰德府禹貢冀州之域天文室壁分野戰國爲魏
之鄴地魏曹操稱爲鄴都又名相州西通澤潞東
接大名南界衛輝北隣洺磁漳河源有二一出山
西路州長子縣名濁漳一出平定州樂平縣名清

漳府城西南七十五里有玄武池魏史曹操還鄴
作玄武池以肄舟師九華宮在臨漳西銅雀臺東
北後趙石虎建銅雀臺在臨漳縣西魏曹操築臺
可望西陵西陵操葬處也西園曹操作子建詩清
夜遊西園卽此韓琦安陽人岳飛湯陰人

衛輝府禹貢冀州之域天文室壁分野本殷紂所
都朝歌地周武王克殷分其地北爲邯鄲東
爲衛康叔封地左孟門右太行蘇門山在輝縣西
北七里一名百門山晉孫登隱此上有嘯臺百泉

在蘇門山泉通百道故名摘星樓在淇縣古朝歌
城上相傳紂與妲己觀斲朝涉之脰處牧野在府
城南陵西社朝歌之南周武王陳師處延津在府
城南曹操使于禁渡河守延津淇園在淇縣西北
衛武公園世恒言河南河北河西河東南宋與北
魏爭河南河北漢武帝時置河西四郡戰國時卽
有河東地名今考之以黃河分界開封南陽一帶
在黃河以南爲河南彰德衛輝一帶在黃河以北
爲河北山西一帶爲河東陝西甘肅一帶爲河西

懷慶府與山西平陽府絳州垣曲縣接界禹貢冀
州覃懷之地天文室壁分野商爲畿內地周初爲
三監及邶鄘衛地總爲河內東帶沁河西連沅水
南據虎牢北倚太行山從山西至此連亘數
千里王屋山在濟源縣西八十里禹貢底柱析城
至于王屋盤谷在濟源縣北二十里唐李愿歸隱
於此司馬懿溫縣人山濤河內懷人裴休濟源人
韓愈南陽人卽今修武縣北南陽城司馬承禎溫
縣人

河南府西與陝西西安府華陰縣接界禹貢豫州
之域天文柳分野武王克商定鼎于郊廓成王營
洛爲王城下都至平王自鎬京東遷乃居王城一
名周南一名洛陽一名三川洛陽有伊洛河三水
故名春秋三川震卽此泝洛背河左伊右瀍洛邑
天地之中孟津縣周武王伐紂師渡孟津卽此登
封縣卽古陽城地禹避舜之子於陽城卽此登封
封嵩
山自此而登故名轘轅關在登封縣西北九十二
曲是爲險道沛公攻平陰絕河津南出轘轅卽此

嵩縣古伊闕地秦晉遷陸渾之戎於此漢置陸渾
縣陝州周爲虢國地周召分治東西以陝爲界故
名陝州二嶠乃嶠山在陝州西東嶠西嶠謂之二
嶠中有文王避雨陵靈寶縣本秦函谷關地與陝
西分界舊函谷關在秦中去長安四百里漢楊僕
請于武帝移秦函谷關立于河南靈寶東僕靈寶
人不欲家在關外故移之是爲漢關去西舊關三
百七十八里北邛山在府城北十里東漢諸陵及
唐宋名臣墳多在此緱氏山在偃師縣南四十里

周靈王太子晉吹笙升仙之所嵩山在登封縣北
十里五岳之中岳陸渾山在嵩縣東北四十里伊
水所出砥柱山在陝州城東四十里黃河中禹貢
導河東至於砥柱卽此從陝至洛此爲界熊耳山
在盧氏縣西南五十里禹貢導洛自熊耳卽此又
宜陽縣亦有熊耳山光武破赤眉積甲與熊耳山
齊是也鬼谷在登封縣北五里蘇秦事師鬼谷子
於此新安縣西周地項籍詐坑秦降卒二十餘萬
於新安城南卽此潼關在閿鄉縣西六十里與陝

西華陰縣分界

南陽府南與湖廣襄陽府襄陽縣接界西與襄陽府鄖縣界禹貢豫州之域天文張分野本夏禹國戰國屬韓在中國之南而居陽地故名鄧州古漢縣有冠軍城霍去病封冠軍侯府城東北七十里有博望城張騫封博望侯漢光武中興自春陵至新野由南陽討河朔昆陽城在葉縣南光武昆陽大戰破王尋於此葉縣沈諸梁封邑王喬爲葉令飛鳥化鳬朔旦朝京師卽此唐改仙鳬縣崆峒山

在汝州西南六十里廣成子隱此崆峒山有三一
在安定一在臨洮此處爲是臥龍岡在府城西南
七里起自嵩山之南數百里至此截住諸葛孔明
隱此得名丹水源出陝西商縣竹山抱朴子云丹
水有魚浮水赤光如火以其血涂足可步行水上
汝寧府東與鳳陽府潁州接界南與湖廣黃州府
黃陂縣界禹貢豫州之域天文角亢氐分野春秋
沈蔡二國又名蔡州又名汝南古息國在息縣北
三十里古黃國古蔡國在汝陽上蔡二縣界光州

在府城東三百里本禹貢揚州之域春秋爲弦黃
蔣三國地唐有蔡州李愬裴度夜半入蔡州城擒
吳元濟今有平淮西碑在府城內與江淮接壤故
名淮西長淮以西也天中山在府城北三里在天
地之中故名自古考日景測分數莫正於此朗陵
山在確山縣南四十里確山舊名朗陵

四川古梁州地

成都府禹貢梁州之域天文井鬼分野入參一度
古爲蜀國漢爲益州爲成都又號錦城孔明云益

州沃野千里天府之國楊雄云華陽西極黑水南
流左思云帶二江之雙流抗峨眉之重阻緣以劍
閣阻以石門蜀之先肇于人皇之際至黃帝子曰
昌意娶蜀山氏女生帝嚳後封其支庶于蜀歷夏
商始稱王國曰蠶叢曰魚臯武擔山在府治北武
都山精化爲女子蜀王開明納爲妃不習水土而
死王遣五丁於武都山擔土爲塚故名青城山在
灌縣西南五十里乃蜀山第一峰前號青城山後
名大面山道書以此山爲第五洞天乃神仙都會

之府雲臺山在彰明縣北二十里一名天柱山乃
漢張道陵天師昇仙之所支機石在府城東海上
人乘槎至天漢得一石歸問嚴君平云是織女支
機石浣花溪在府城西南五里鹿頭關在德陽縣
北三十里玉壘關在灌縣西萬里橋在府城中和
門外望帝祠祠蜀望帝杜宇錦官城在萬里橋南
司馬相如成都人楊雄成都人袁天綱成都人
保寧府西北至陝西漢中府沔縣界禹貢梁州之
域天文井鬼分野春秋爲巴國地又爲巴西又爲

卷之三
閬州巴縣秦爲宕渠劍州卽梓潼縣地又云劍南
劍門在北境孔明所立劍閣在劍州北三十里兩
岩峻拔鑿石架閣爲棧道秦司馬錯由此道伐蜀
洛下閔閬中人

順慶府禹貢梁州之域天文參井分野春秋戰國
時爲巴子國又名宕渠嘉陵江在府治東自大散
關歷興州大安軍利川州至此爲一郡形勝

敘州府禹貢梁州之域天文井鬼分野古爲棘國
冀建爲郢東距廬水西連大峨南通六詔北接三

榮朱提山在府城西五十里山出銀黑水在府城
東南十五里禹導黑水至于三危南流入于海
重慶府禹貢梁州之域天文井鬼分野周時爲巴
子國東至魚復西通棘道北接漢出商隣夜郎涪
江在府城西北來自嘉陵江經合州至城北入岷
江巴江在府城東北閬水與白水合流曲折三回
如巴字因名黔江自思州上發源經五十八節與
施州江合流經彭水等縣凡五百餘里與岷江會
于涪江之東以其出于黔州故名

夔州府東南通湖廣北接陝西漢中府平利縣禹
貢荆梁二州之域天文翼軫分野周初爲魚復國
巫山縣以巫峽得名雲陽縣卽雲安據荆楚上游
白帝山在府城東五里公孫述名山述自稱白帝
有白帝城赤甲山在府城東北七里不生草木土
石皆赤漢時取巴人爲赤甲軍陽臺山在巫山縣
北以巫山神女得名巫山十二峯首尾一百六十
里巫峽與西陵峽歸峽並稱三峽連山七百里無
斷處自非亭午夜分不見日月瞿唐峽在府城東

乃三峽之門兩崖對峙中貫一江灩澦堆當其口
江心突兀而起諺云灩澦大如象瞿唐不可上灩
澦大如馬瞿唐不可下瀼水宜灌田又有瀼西丙
穴在達縣東北出嘉魚長身細鱗肉白如玉杜詩
魚知丙穴由來美古楚宮在巫山縣楚襄王嘗遊
其地夢與巫山神女遇永安宮在臥龍山下蜀先
主崩于此宮杜詩崩年亦在永安宮瞿唐關在府
城東八里城下舊有鎖水二鉄柱鬼門關在府城
東北三十里朐肭城在雲陽縣西六十里朐肭屬

巴東郡古地名

馬湖府禹貢梁州之東域天文鬼分野古夔侯國之境夷獠所居漢武帝通西南夷始置郡縣爲犍爲牂牁二郡昔有龍馬潛于馬湖江因名又名龍湖南距戎瀘北走普資夷夏雜居散處山箐信鬼不藥

潼川州禹貢梁州之域天文井鬼分野蜀地蜀漢分置梓潼郡又曰梓州據涪水之上游劍外一都會陳子昂梓州射洪人張道陵天師在遂寧縣鶴

鳴山修道

眉州禹貢梁州之域天文井鬼分野亦犍爲郡地
又曰眉山青神郡古城在青神縣三蘇眉山山人
嘉定州禹貢梁州之域天文井鬼分野亦犍爲郡
地

邛縣卽漢臨邛縣地漢司馬相如訪臨邛令王吉
得卓王孫女卽此峨眉山在峨眉山縣南周成王時
葛由嘗乘木羊上此山又名綏山乃普賢菩薩道
場嚴君平臨邛人

瀘州禹貢梁州之域天文井鬼分野亦巴國地以
瀘江得名源自岷山流入合江縣界路通雲南交
趾

雅州禹貢梁州之域天文井鬼分野丙穴在州城
南平羌江在州城北羌夷入寇諸葛於此平之李
白詩影入平羌江水流

東川軍民府南界雲南禹貢梁州之域天文參分
野地名東川甸烏蠻仲牟由之裔

烏蒙軍民府禹貢梁州之域天文井鬼分野漢爲

牂牁郡地

烏撒軍民府東至貴州界南至雲南界禹貢梁州
之域天文井鬼分野烏蠻地其民刀耕火種荷耜
被毳

芒部軍民府禹貢梁州之域天文井鬼分野烏蠻
地

播州宣慰使司禹貢梁州之域天文井鬼分野夜
郎地漢屬牂牁李白長流夜郎卽此

永寧宣撫司禹貢梁州之南境天文井鬼分野上

通雲南北連川廣

龍州宜撫司禹貢梁州之域天文井鬼分野周秦
時爲氏羌地漢爲陰平道東界陝西漢中府沔縣
天全六番招討使司禹貢梁州之南境天文井鬼
分野古獠蠻地

黎州安撫司禹貢梁州之西境天文井鬼分野古
西南夷徠都地一名沉黎

平茶洞長官司西界貴州銅仁府禹貢荆梁二州
之界天文軫分野戰國楚爲黔中地藩籬西陽路

通荆楚

松潘等處軍民指揮使司西界吐蕃北界陝西洮
州衛禹貢梁州之域天文觜參分野古氏羗地

疊溪守禦軍民千戶所禹貢梁州之域天文觜參
分野古氏羗地

四川行都指揮使司南界雲南武定府禹貢梁州
之境天文井鬼分野西南夷印都國地亦名越嶲
郡東連烏蒙西距吐蕃諸葛亮征南蠻五月渡瀘
卽此處

南京古金陵地吳晉宋齊梁陳及南唐並於此建
都然僅保一隅不能混一龍蟠虎踞金陵王氣千
百年以來我太祖當之矣京城去秦淮五里盡
鍾山之麓城周圍九十六里

應天府禹貢揚州之域天文斗分野春秋屬吳戰
國屬越楚威王因其地有王氣埋金以鎮之故名
金陵秦始皇改秣陵吳改爲建業又爲建康鍾山
在府東北因蔣子文死爲神吳大帝爲立廟改其
山爲蔣山石頭山在府西二里有石頭城吳築聚

寶山在府南旁有雨花臺梁武帝時雲光法師講
經感天雨花覆舟山在府北七里東連鍾山北臨
玄武鷄鳴山在府西北七里齊竟陵王子良移居
山下集四學之士抄五經百家之書牛首山在府
南三十里二峯東西相對晉元帝作宮殿王導指
雙峯曰此天闕也故又名天闕山東山在府城東
南三十里晉謝安懷會稽東山築土山擬之茅山
在句容縣東南四十五里山形如句字初名句曲
山後因三茅君於此得道名茅山道書爲第八洞

天第一福地良常山在茅山小茅峯之北秦始皇
曰巡狩之樂莫過於山海自今以往良爲常也乃
改句容北垂爲良常玄武湖在太平門外周圍四
十里今稱後湖太子湖在府北大里梁昭明太子
植蓮於此秦淮水在上元縣東南三里秦始皇時
望氣者言金陵有天子氣乃使朱衣三千鑿方山
爲瀆以斷地脉以秦開故名秦淮八功德水在鍾
山東梁有胡僧曇隱寓錫於此乏水有山龍爲開
一沼景陽井在臺城內一名胭脂井陳後主與張

麗華孔貴嬪投其中以避隋兵後人名爲辱井投
金瀨在溧陽縣西北四十里伍子胥投金於瀨以
報擊絮女子處臨春閣結綺閣望仙閣俱陳主建
在臺城內桺葉渡在秦淮口晉王獻之作詩送愛
妾桃葉桃根處報恩寺在聚寶門外天界寺在聚
寶門外靈谷寺在鍾山東南有寶誌公塢棲霞寺
在攝山有隋文帝葬舍利塢吳大帝陵在鍾山南
八里吳孫權葬處蝦蟆陵六朝葬宮人處冶城在
今朝天宮後吳冶鑄之地晉謝安與王羲之同訪

冶城悠然遐想有超世之志石頭城在府西二里
臺城在上元縣東北五里鍾山之側其地據高以
臨下白下城在府治西北十四里齊武帝建謝公
墩在今朝天宮後謝安遊處華林園在臺城內晉
簡文帝在華林園曰會心處不必在遠翛然臨水
便有濠濮間趣鳥獸禽魚自來親人烏衣巷在府
南晉王導謝安居此子弟皆烏衣因名巷口有朱
雀橋長千里金陵五里有山岡其間平地甚長故
名長干山隴之間謂之干晉葛洪許邁俱句容人

陶弘景秣陵人

中都鳳陽府禹貢揚州之域天文斗分野古爲塗
山氏國大禹會萬國諸侯之所我高皇帝龍興
之地戰國時屬楚淮南郡秦屬九江郡漢更屬淮
南東漢爲鍾離侯國壽州春秋爲六蓼國地楚遷
都於此秦爲壽春東晉改壽陽霍丘本周霍叔封
邑蒙城本漢沛郡之山桑縣泗州禹貢徐州春秋
時徐子國塗山在懷遠縣東南八里與荆山對峙
禹娶塗山卽此荆山乃下和采玉之所八公山在

壽州東北五里淝水之北淮水之南漢淮南王安
與其賓客八公俱登此山學仙晉謝玄禦符堅堅
兵大敗望見八公山草木皆兵都梁山在盱眙縣
東南五十里產都梁香草淮水發源桐栢山入潁
上界至壽州西北合淝水至懷遠縣合渦水東流
歷府北境又東北入泗州至清河口會泗水東入
于海濠水府舊城西南有石絕水名濠梁莊子觀
魚於此淝水源出宿州龍山湖東流至懷遠縣入
淮渦水自黃河東流經蒙城縣沿懷遠縣東北與

淮水合流東入於海潁水自河南項城縣界流入
太和潁上下達淮泗西湖在潁州西北二里長十
里宋晏殊歐陽修蘇軾相繼爲守宴賞於此壽州
有真珠泉世傳淮南王煉丹所每聞人聲則珠泉
湧出咄泉咄之則泉湧陰陵城在定遠縣西北六
十里灌嬰追項羽失道卽此垓下在虹縣西五十
里漢兵圍項羽垓下卽此漆園在定遠縣三十里
卽莊子爲吏處金梭堆在壽州東十里淮南王遺
金於此人多於雨後得之亳州古有苦縣晉改穀

陽縣隋改仙源縣老子生此史記老子傳老子楚

苦縣厲鄉曲仁里人今有老子宅及廟

苦音戶厲

音賴

管仲賴上人曹植譙人譙在亳縣

蘇州府禹貢揚州之域天文斗分野周泰伯仲雍
始居之地武王封仲雍曾孫於此爲吳國又名吳
會謂地本吳會稽二郡也又曰姑蘇以山名又曰
吳郡虎丘山在府城西北九里吳王闔閭葬此山
葬三日金銀之氣結爲白虎蹲踞其上因名天平
山在府城西二十里文礪山在府城西南二十五

里有支硎寺乃晉支遁居處靈岩山在府城西南
二十五里乃吳王館娃宮故地下瞰太湖望洞庭
有西施涇花池采香徑琴臺諸勝陽山在府城
西北三十里越王葬吳王夫差於此姑蘇山在府
城西四十里亦名姑胥穹隆山在府城西南六十
里洞庭山在府城西一百三十里太湖中一名包
山下有洞穴潛行水底無所不通道書爲第九洞
天三江在崑山縣南九里禹貢三江旣入震澤底
定松江七十里分流東北入海者爲婁江東流者

爲東江併松爲三江其地名今名三江口范蠡乘
舟出三江口卽此石湖在府城西南十二里連越
來溪太湖在府城西南五十里禹貢謂之震澤周
官爾雅謂之具區憨泉在虎丘僧憨憨卓錫所出
銷夏灣在洞庭西山吳王避暑處錦帆涇卽府城
濠吳王錦帆經遊處白馬澗在府城南二十五里
支遁養馬處百花洲在姑蘇山姑蘇臺在姑蘇山
高見三百里楓橋在府城西七里近寒山寺響屧
廊在靈岩寺西施行處長洲苑在太湖北岸吳王

闔閭遊獵處要離塚在府城西四里梁鴻墓在要離塚北臯伯通曰要離烈士梁鴻清高葬可相近唐詩旅墳三尺近要離梁鴻平陵人適吳依臯伯通居廡下爲人賃舂范仲淹蘇州人

松江府禹貢揚州之域天文斗分野吳地又爲婁縣地又曰雲間以雲間陸士龍語而得名機山在府城西北二十里以陸機得名山下有平原村以機爲平原內史滬瀆江在府城西北六十里晉袁山松築壘禦孫恩三泖湖在府城西南三十六里

天水晴徹時隱隱下見故城郭街衢

常州府禹貢揚州之域天文斗分野曰延陵以季
札名漢名毗陵晉名晉陵又名句吳武進縣梁爲
蘭陵無錫爲梁溪宜興爲義興又曰陽羨又曰荆
溪錫山慧山俱在無錫縣西七里慧山泉爲天下
第二泉張公洞在宜興縣南三十里善卷洞在宜
興國山東南蘇軾流寓陽羨還媼買宅券寓顧塘
橋孫氏逆旅而沒

鎮江府禹貢揚州之域天文斗分野吳地三國吳

名京口劉宋名南徐又曰潤州古名朱方以其爲
大江以南地京口晉名北府郗愔在北府桓溫嘗
云京口酒可飲兵可用深忌惜居之府城內又有
東堂晉劉毅與知識嘗射于此處今名射堂丹徒
秦始皇時望氣者言其地有王氣使赭衣三千徒
鑿京峴山爲長坑以破其勢故名丹徒丹陽秦名
雲陽金壇茅山爲金壇之虛臺天后之便闕故名
北固山在府城北下臨長江金山在府城西北七
里元立大江中焦山在府城東北九里大江中以

高士焦先隱此得名焦山有瘞鶴銘陶隱居書金
焦兩山相望蒜山在府城西五里大江岸上唐詩
蒜山晴日照揚州淥水橋在府治西杜牧詩青苔
寺裡無馬跡淥水橋邊多酒樓丁卯橋在府城南
三里晉元帝子哀鎮廣陵運糧出京口水涸以丁
卯日奏立埭建橋故名唐許渾嘗築別墅於其側
甘露寺在北固山上吳甘露中建故名鐵甕城吳
孫權築呂城在丹陽縣東五十四里呂蒙所築
揚州府禹貢揚州之域天文斗分野吳地戰國時

屬楚秦爲九江郡地漢初爲淮南國淮南王所都
并壽州皆爲淮南興化甯應泰州通州總屬海陵
地一名淮海一名維揚一名廣陵瓜步山在儀真
縣西四十七里魏大武嘗屯兵于此狼山在通州
南十八里一名狼五山臨大江迷樓在府城西七
里隋煬帝建帝曰卽使真仙遊此亦自當迷遂名
二十四橋在府城隋置杜牧詩二十四橋明月月
玉人何處教吹簫高郵州城外九十二里有地名
三阿一名北阿晉史秦陷盱眙進圍三阿謝玄連

戰敗走之唐又名下阿

淮安府北界山東青州府莒州禹貢揚州之域天文斗牛分野古名淮陰又名山陽海州古郟國秦時秦嘉起兵於郟

郟音談

羽山在顓榆縣西北八

十里卽舜殛鯀處射陽湖在山陽縣東南七十里一名射陂勝下橋在府城西四十里卽韓信爲少年辱處圯橋在邳州城東南隅卽黃石公授張良素書之所城北百里有黃石山上有黃石公廟奉婦廟在海州城北三十里巨平山北前漢東海有

孝婦冤死郡中大旱三年守祭孝婦天乃大雨因
立廟漂母墓在府城西四十里韓信立塚以報漂
母卽此韓信母墓在舊淮陰縣北信母死貧無以
葬然行營高敞地令傍可置萬家邑卽此下相城
在邳州城西南宿遷縣秦名下相相傳項羽所生
處張良韓人募力士以鐵椎徂擊秦皇於博浪沙
中誤中副車亡匿下邳韓信淮陰人陳琳建安七
子射陽人徐有功東海人武后時爲司刑卿多所
全活起居舍人盧若虛曰當雷霆之震能全仁恕

千載未見其儔宋陸秀夫楚州鹽城人

廬州府西界河南汝寧府固始縣禹貢揚州之域
天文斗分野周以前爲廬子國春秋時屬舒戰國
時屬楚秦爲九江郡六安州古六國春秋爲六蓼
國英布爲九江王都六布六人也浮槎山在府城
東八十里相傳此山自海上浮來有梵僧過而指
曰此乃耆闍一峯也梁武帝女爲尼于山建道林
寺龍穴山在府城西一百二十里卽鄭祥遠與張
路斯鬪不勝投合肥西山以死處張與鄭皆龍也

龍眠山在舒城縣西南八十里宋李公麟以龍眠居士爲號亞父山在巢縣東八十里范增居此山故名巢湖在巢縣西十五里昔有巫言居巢縣門石龜口出血當陷爲湖有人以猪血戲塗之巫見驚走果陷濡須水在巢縣南曹操與孫權相拒於濡須月餘權與操書曰春水方生公宜速去操乃還濡須塢在無爲州東北五十里相傳禹所鑿地接巢湖湖東南有石渠鑿山通水周瑜廬江人安慶府西界湖廣黃州府黃梅縣禹貢揚州之域

天文斗分野春秋時爲皖國戰國時屬楚秦屬九江郡一名皖城一名古舒潛山天柱峯在潛山縣西北二十里魏左慈嘗居此煉丹漢武帝封禪嫌衡山江漢道遠祀此山以代南岳故稱南岳之副皖山與潛山連小孤山在宿松縣南一百二十里江北岸孤峯峭拔與南岸山對峙如門大江之水至此隘東上有神女廟對彭郎磯故俗有小姑嫁彭郎之語晉何充何胤並潛人點與梁武帝有舊不就官而隱

太平府禹貢揚州之域六文斗分野一名姑孰漢
屬丹陽縣南指龍山北臨牛渚采石之險甲於東
南繁昌縣西南十二里赭圻城晉桓溫爲袁帝詔
入朝止之溫遂城赭圻以居牛渚山在府城北二
十里下有磯曰牛渚去采石磯僅一里晉溫嶠燃
犀照水恠之所又名燃犀浦采石山在府城北二
十五里牛渚北昔人於此取石因名臨江有磯曰
采石李白嘗與崔宗之乘月泛舟着宮錦袍自采
石至金陵卽此青山在府城東南三十里齊宣城

太守謝朓嘗築室于山南又名謝公山望夫山在府城北四十里昔有人往楚累歲不還其妻登此山望之乃化爲石唐王建有詩螭磯在蕪湖縣西南七里大江中螭老蛟也

寧國府禹貢揚州之域天文斗分野漢爲丹陽郡陵陽山在府城內陵陽子明居此得名敬亭山在府城北十里謝靈運李白皆有詩文春山在寧國縣西三十里晉瞿硎披鹿裘隱此山桓溫嘗訪之宛溪在府城東句溪在府城東五里水形如句字

故名赭圻城在南陵縣北一百三十里西臨大江
吳所置赭圻屯晉桓溫入朝有詔止之遂城赭圻
鎮焉

池州府西界江西九江府彭澤縣禹貢揚州之域
天文斗分野舊亦屬丹陽郡一名池陽一名秋浦
九華山在青陽縣南舊名九子山李白改爲九華
山以山九峯如蓮華也秋浦在府城西南八十里
李白杜牧皆有詩

徽州府東界浙江杭州府昌化縣禹貢揚州之域

天文斗分野亦古丹陽郡地一名新都一名新安
烏聊山在府城內東南隅城陽山在府城南二里
唐仙人許宣平隱此黃山在府城西北一百二十
里黃帝嘗與容成公浮丘公合丹於此故名黃山
白岳山在休寧縣西四十里一名齊雲山真武修
仙之地大鄣山在績溪縣東六十里舊名三天子
鄣山新安江源有四一出歙縣黃山一出休寧率
山一出績溪大鄣山一出婺源浙水合流至新安
爲灘三百六十黃墩湖在府城西南四十五里陳

有程靈洗者射蛟于此

廣德州禹貢揚州之域天文斗分野地名桐汭吳之西疆故鄣之墟

和州禹貢揚州之域天文斗分野春秋戰國皆爲楚地屬九江郡舊名歷陽以歷陽山得名陰陵山在州城北八十里卽項羽迷失道處橫江在州城東南二十五里隋將韓擒虎平陳自橫江濟師卽此烏江浦在州城北故烏江縣項羽敗垓下走至烏江亭長艤舟不渡自刎卽此

滁州禹貢揚州之域天文斗分野春秋時爲吳楚之交戰國屬楚秦爲九江郡地琅琊山在州城南十里晉琅琊王嘗駐此因名兩峯間有釀泉山上有醉翁亭豐樂亭歐陽修有記又有庶子泉以唐庶子李幼卿得名兩澗在州城西韋應物有詩清流關在州城西南二十里卽宋太祖破南唐將皇甫暉處

徐州西界河南歸德府北界山東兗州滕縣禹貢徐州之域天文房心分野本古大彭氏國春秋爲

宋地戰國屬楚項羽自立爲西楚霸王都於此按
自淮北沛郡陳州汝南南郡此西楚也彭城以東
東海吳郡廣陵此東楚也衡山九江江南豫章長
沙此南楚也徐州一名彭城東近齊魯北屬趙魏
南通江淮西接梁楚蕭縣古蕭子國彭城亦以彭
祖所居得名彭祖顓頊玄孫爲殷賢臣壽八百一
歲封于彭城有墓在畱城在沛縣東南二十里張
良受封畱侯處豐沛乃漢高祖湯沐邑豐縣有故
宅彭城山在州城東北三里雲龍山在州城東南

二里宋時山人張天驥所居蘇軾有詩桓山在州
城東北二十七里桓魋爲石槨三年不成處呂梁
山在州城東南六十里下有二洪莊子云懸水三
十仞流沫四十里波流甚險礪山在礪山縣東南
七十里漢高帝微時嘗隱於山上有雲氣呂后與
人俱求得之卽此泗水源出山東泗水縣南流過
沛縣至州城東北合沛水循城東南以達于淮周
顯王時九鼎淪沒于泗秦時鼎氣浮于水上始皇
使數千人沒水求之不獲汴水自河南開封府界

東流過蕭縣至州城東北與泗水通濰水在州城南六十里項羽敗漢兵濰水上濰水爲之不流卽此大澤在豐縣北六里高祖母夢與神遇處漢高祖斬蛇溝在豐縣西二十里沛宮在沛縣東南高祖置酒宴沛父老處燕子樓在州城西北隅唐尚書張建封妾盼盼所居黃樓在州東北隅蘇軾爲守增築徐城以捍水因作樓堊以黃土曰土實勝水放鶴亭在雲龍山張天驥作歌風臺在沛縣東南泗水西岸高祖征英布還沛宴父老作大風歌

鴻苞集卷之四

明東海屠 隆緯真著

西吳茅元儀公選訂

輿圖要略下

浙江

杭州府禹貢揚州之域天文斗分野吳地一名虎
林後改武林一名古杭左浙江右具區北大海南
天目外帶江海內抱湖山吳山在府城東南吳人
憐子胥以諫死立祠其上又名胥山南屏山在府

城西三里孤山在府外西湖上有林逋墓祠秦望山在府城南十里秦始皇東遊登此大滌山在餘杭縣西南十八里名大滌極玄洞天居洞天第三十四許邁修真之所天柱山在餘杭縣西南十八里爲道家第五十七福地衣錦山在臨安縣吳越王錢鏐旣貴宴父老山林皆覆以錦繡號其幼時所戲木曰衣錦將軍天目山在臨安縣西五十里爲道家第三十四洞天山下兩湖若左右目故名左屬臨安右屬於潛與湖州安吉州界南北二高

峯在府城西飛來峯在府城西二十里西天僧慧
理登此山嘆曰此是中天竺國靈鷲山之小嶺不
知何年飛來因號曰飛來峯呼猿洞在武林山慧
理畜白猿于靈隱寺月明長嘯清音滿室西湖在
府城西周圍三十里湖形頗高于城郭參寥泉在
西湖智果寺參寥子蘇軾方外友也錢塘江一名
羅剎江江東南有羅剎石橫截江濤險如羅剎也
羅隱詩云羅剎江邊地欲浮總名浙江潮水出海
曲折倒流故名富春江在富陽縣南卽浙江之上

流虎跑泉在府城西南虎跑寺性空禪師居大慈
山無水欲徙忽有神人告曰明日當有水是夜二
虎跑地湧泉故名宋大內在鳳皇山之東本梁安
國寺地故吳越王宮宋高宗南渡建以爲宮增築
皇城宋宮殿甚多不及悉記紫陽菴在瑞石山上
仙人于野鶴修道于此今遺蛻存焉褚遂良錢唐
人許遠新城人與張巡同死祿山之難錢鏐臨安
人有功封吳越王謚武肅傳子文穆王元瓘孫忠
獻王仁佐至忠懿王俶納土于宋羅隱佐錢鏐新

城人林逋錢唐人張九成錢唐人諡文忠

嘉興府東界直隸松江府華亭縣北界直隸蘇州府吳江縣禹貢揚州之域天文斗分野春秋時地名長水又名檣李又名就李胥山在府城東南三十里伍子胥伐越經營于此故名秦駐山在海鹽縣南十八里秦始皇東遊嘗登此山因名鴛鴦湖在府城南三里一名南湖語溪在崇德縣東南一名語兒涇一名禦兒港陸贄嘉興人

湖州府東界蘇州府吳江縣西界廣德州北界蘇

州府吳縣禹貢揚州之域天文斗牛分野古爲防
風氏之國吳名吳興又名霅川峴山在府城南五
里道場山在府城南十二里西塞山在府城西二
十五里唐張志和有詩太湖在府城北二十八里
烏程長興之間縱廣二百八十三里周三萬六千
頃跨湖宣蘇常四郡境罨画溪在長興縣西八里
古木夾岸叢修翳其下朱藤藪其上景如罨畫苕
溪在府城西霅溪在府城南唐張志和號玄真子
金華人寓吳興又號煙波釣徒沈麟士武康人號

織簾居士沈約武康人陸龜蒙長興人孟郊武康人錢起長興人

嚴州府西界徽州府歙縣禹貢揚州之域天文牛女分野一名嚴陵以子陵得名據浙江上游當甌歙數道之衝桐君山在桐廬縣東二里昔有異人於此山采藥求道結廬於桐樹下人間其姓指桐以示之因號爲桐君富春山一名嚴陵山在桐廬縣西三十里乃漢嚴子陵隱釣處前臨大江上有東西二釣臺唐方干桐廬人隱居釣臺施肩吾分

水人遇旌陽授以丹方仙去

金華府禹貢揚州之域天文牛女分野春秋時爲
越西界秦屬會稽郡漢爲烏傷縣地金星與婺女
爭華故曰金華又名婺州金華山在府城北二十
里黃初平於此得道叱石爲羊東有臥羊山卽其
處仙華山在浦江縣北八里一名仙姑山世傳黃
帝少女於此得道上昇金華洞在府城北三十里
卽道書第三十六金華洞元之天通四明天台諸
山八詠樓在府治西南隅太守沈約建顏烏會稽

烏傷人事親至孝父亡負土成墳羣烏啣土助之
烏吻皆傷因以名縣駱賓王義烏人張志和金華
人宗澤義烏人

衢州府西界江西廣信府玉山縣南界福建建寧
府浦城縣禹貢揚州之域天文牛女分野春秋爲
越西鄙姑蔑之地秦立太末縣又名信安爛柯山
在府城南二十里道書爲青霞第八洞天晉樵者
王質入山看二童子對弈斧柯已爛龍丘山在龍
游縣東四十里漢龍丘萇隱居於此與嚴子陵友

善江郎山在江山縣南五十里俗傳兄弟三人登山而化爲石故名山頂有池產白蓮金鯽徐偃王廟在龍游縣西四十里徐山下殷浩北伐敗于姚襄爲桓溫貶爲庶人徙居信安今府城南六里有殷浩宅唐詩紅樹半藏殷浩宅綠蘿深覆偃王祠姑蔑城在龍游縣澁溪之南春秋時有姑蔑子處州府禹貢揚州之域天文斗分野越地又名括蒼仙都山在縉雲縣東二十三里一名縉雲山道書爲玄都祈福洞天相傳黃帝嘗登此山山巔有

鼎湖卽黃帝騎龍上昇之處括蒼山在府城西突
星瀨在府城東四十里地名箭溪晉王羲之書突
星瀨于石後里人苦州縣募打之擾推墮潭中處
州爲古緡雲墟上應牽牛之宿下當少陽之位黃
帝煉丹昇真於此仙靈之玄都神州之最勝也

本朝劉基青田人

紹興府禹貢揚州之域天文牛女分野禹會諸侯
於此爵有德封有功命曰會稽少康封少子無餘
於會稽以奉禹祀號曰於越春秋戰國時爲越國

餘姚者舜後支庶所封以舜姓姚故名上虞亦以
虞舜之後封邑得名會稽山在府城東十二里揚
州之鎮山也史記注禹到大越上茅山爵有德封
有功更名會稽山中有孔穴號陽明洞一名極玄
太元之天卽三十六洞天之第十一也宛委山在
府城東南十五里遁甲開山圖禹開宛委山得赤
琰如日碧珪如月又中得金簡玉字之書悟百川
之理石匱山在府城東南十五里山有石匱壁立
相傳禹治水畢藏書於此又云禹藏靈秘圖之所

故又名秘圖山。戢山在府城東北六里。吳越春秋
越王嗜戢嘗采食之。因以名山。晉王羲之居此有
洗墨池。土城山在府城東六里。卽越王得苧蘿山
采薪之女西施教以歌舞。進吳王處。又名西施山。
葛山在府城東十里。卽越王使人采葛治布以獻
吳王處。越女歌曰：嘗膽不苦，味若飴。令我采葛以
作絲。石帆山在府城東十五里。遙望如張帆臨水
射的山在府城南十五里。山有半石室，乃仙人射
堂。東峯有射的。遙望山壁有白點如射侯。秦望山

在府城東南四十里始皇登此山望海雲門山在
府城南三十里晉王獻之居此有雲門寺越王山
在府城西南一百二十里越王棲兵於此上有走
馬岡伏兵路洗馬池支更樓故址蕭山在蕭山縣
治西晉許詢嘗登此山馮林築室蕭然自放故名
蕭山五泄山在諸暨縣西五十里上有泉水飛沫
如雪客星山在餘姚縣東北子陵嘗居此故名東
山在上虞縣西南四十五里晉謝安居此有薔薇
洞白雲明月亭遺蹟桐柏山今名池山在嵊縣東

七十二里上有金庭洞道書爲第二十七洞天
下有丹池赤水宋宴姝云越有桐柏之金庭養真之
福地南明山在新昌縣治晉支遁葬此沃洲山在
新昌縣東三十五里與天姥山對峙道書爲第十
五福地晉支遁居之有養馬坡放鶴亭天姥山在
新昌縣東南五十里東接天台昔人登此山聞天
姥歌謠之聲道書爲第十六福地錢清江在府城
西五十五里以漢守劉寵一錢得名鏡湖在府城
西南三十里王羲之云從山陰路上行如在鏡中

行曹娥江在府城東南七十里漢曹娥求父屍不
得投江而死故名其江縣長度尚葬娥于江南道
旁屬邯鄲淳撰碑文甚美若耶溪在府城南二十
五里與鏡湖合西施采蓮歐冶鑄劍於此了溪在
餘糧山下產禹餘糧蘭渚在府城南二十五里卽
王羲之序所謂清流激湍映帶左右處樵風涇在
府城東南二十五里漢鄭弘采薪得一箭頃之有
人覓箭弘與之問弘何所欲曰常患若耶溪載薪
爲難願朝南風暮北風後果然世號樵風涇固陵

又名西陵越王句踐與大夫種范蠡入臣于吳羣
臣送之浙江之上臨水祖道軍陳固陵卽此後錢
鏐改爲西興蓬萊閣在臥龍山上錢鏐建舊志蓬
萊山正屬會稽閣名蓬萊以此柯亭在山陰縣西
北四十里卽蔡邕取竹作笛處蘭亭在山陰縣西
南二十五里王羲之與諸賢會處越王臺在府城
中句踐登眺之所南鎮廟在府城南十三里祀南
鎮會稽山之神禹廟在會稽山禹陵側禹巡狩江
南崩而葬焉故此處有禹陵禹穴在會稽山龍瑞

宮側太史公上會稽探禹穴今不可考矣雷門卽
今府城五雲門會稽志雷門上有大鼓聲聞洛陽
王尊傳毋持布鼓過雷門謝安陽夏人王羲之琅
琊臨沂人戴逵晉黠國人俱流寓會稽嚴光餘姚
人王充上虞人虞翻餘姚人謝靈運上虞人虞世
南餘姚人

寧波府禹貢揚州之域天文牛女分野古堊子國
夏商周皆爲越地隋爲句章縣後爲明州爲甬東
爲四明赤堊山在府城東四十里山上有草名赤

董縣以此得名加邑越絕書歐冶子爲越王鑄劍
赤董山破而出錫若耶溪澗而出銅鄮山在府城
東三十六里貿加邑亦以名縣它山唐令王元緯
築堰山下捍水至今有廟在堰旁天井山在府城
西南五十里上有五井神龍所宅歲旱祈雨甚應
阿育王山在府城東五十里舊名鄮山晉太康中
并州人劉薩訶得阿育王埵於此因名至今有舍
利殿天童山在府城東六十里太白山在府城東
六十里金峨山在府城南八十里四明山在府城

南一百五十里周圍八百里跨紹興台州之境道
書爲丹山赤水之天居三十六洞天之第九上有
石窓四穴通日月星辰之光故曰四明劉綱及妻
樊夫人於此得道大隱山在慈溪縣南三十七里
晉虞喜嘗隱此山三召不起故名車廐山在慈溪
縣西南四十里越王句踐停車秣馬於此雪竇山
在奉化縣西北六十四里中有雪竇寺千丈岩瀑
布泉錦鏡池含珠林隱潭諸勝招竇山在定海縣
東五里一名侯濤山峯名鰲柱峯補陀洛伽山在

定海縣東北故昌國縣海中一名梅岑山一名小白華山觀音大士大道場鄞慈溪定海象山四縣皆濱海日本諸蕃市舶通道剡溪在奉化縣西七里入縣境凡九曲入奉化江日月二湖在府城中南隅東錢湖在府城東二十五里越文種鄞人秦夏黃公鄞人卽四皓之一漢任弈文章燦美句章人孝子董黯句章人吳闕澤句章人唐賀知章四明人宋陳禾鄞人

台州府禹貢揚州之域天文牛女分野越地一名

赤城一名天台蓋竹山在府城南三十里有洞名
長耀寶光之天道書爲第十九洞天委羽山在黃
岩縣南十里道書以此山爲第二洞天號大有空
明之天天台山在天台縣西一百十五里道書是
山上應台星有石橋陡絕中有方廣寺國清寺晉
孫綽有天台山賦桐柏山在天台縣西北二十五
里此山乃王子晉所治山上有桐柏宮朝斗壇唐
司馬承禎亦隱此華頂峯在天台縣東北六十里
高萬丈絕頂可望滄海括蒼洞在仙居縣東南三

十八里名曰成德隱元之天第十洞天也隱身岩
在寒石山旁豐于禪師語太守問丘胤曰寒山拾
得卽文殊普賢後身也問丘往見之二人笑曰豐
于饒舌遂隱身入岩中岩卽隨金玉京洞在赤城
山道書爲十大洞天之第六晉許邁居此與王羲
之書云自山陰至臨海多有金庭玉堂仙人芝草
謂此桃源洞在天台縣西北二十五里一名桃花
洞又名劉阮洞劉晨阮肇入山遇仙女卽此處
温州府南界福建福州府福寧縣禹貢揚州之域

天文斗牛女分野越地漢初爲東甌王國屬閩地
永嘉爲東甌鬱林爲西甌一名永嘉一名東嘉後
改屬會稽華蓋山在府城東道書爲第十八洞天
容成太王之天吹臺山在府城南二十里爲王子
晉吹簫處雁蕩山在樂清縣東九十里有瀑布龍
湫諸勝仙岩山在瑞安縣東四十里道書爲第二
十六福地謝客岩在積穀山下謝靈運題詩石厓
故名

江西

南昌府禹貢揚州之域天文斗分野春秋戰國時
爲吳楚之交漢名豫章隋名洪都豫章以產木得
名洪都以洪崖先生隱處得名西山在府城西大
江之外三十里上有仙洞道書第十二天柱寶極
真天逍遙山在府城西南八十里乃道家第四十
福地南有許旌陽王隆宮松門山在府城北二百
十五里上有石鏡光可照人謝靈運有詩翻車岡
在府城西南四十里許旌陽役夫許大者與妻運
米至此忽聞真君拔宅上昇倉皇奔歸遂覆車於

此洪崖在府城西三十里乃洪崖先生得道之處
近西山章江在府城西一名贛江上從豐城縣界
流至南浦折而北流下入鄱陽湖滕王閣在府城
西章江門城上西臨大江唐高祖子元嬰督帥洪
州時建閣成命至封爲滕王因名其閣王勃作序
府城北一百四十里有椒丘城吳孫策狗豫章攻
華歆屯兵椒丘卽此紫極宮在府城南吳猛女吳
綵鸞下嫁文簫卽此處王隆萬壽宮在府城西八
十里晉許遜故宅舊名遊帷觀鉄柱宮在府城內

宮前有井水深黑與江水消長鉄柱立其中鎖遶
出長江真君鎖蛟處黃堂隆道宮在府城南許遜
吳猛師丹陽黃堂謀母於此授淨明忠孝大道昌
邑在府城北六十里卽漢昌邑王賀廢立受封處
徐穉南昌人黃庭堅分寧人

饒州府北界直隸池州府建德縣禹貢揚州之域
天文斗分野楚東境馬跡山在府城東北三十里
道書爲五十二福地晉王遙煉丹其上鄱陽湖在
鄱陽縣西四十里卽禹貢彭蠡也雷煥識豐城劍

氣者鄱陽人陶侃鄱陽人洪皓樂平人

廣信府東界浙江常山縣南界福建崇安縣禹貢
揚州之域天文斗分野春秋戰國迭爲吳楚地懷
玉山在玉山縣北一百二十里南唐時縣令楊文
逸嘗夢一羽士自稱懷玉山人來謁未幾其孫億
生龍虎山在貴溪縣西南八十里道書爲三十二
福地乃漢天師張道陵修煉之所

南康府禹貢荆揚二州之域天文斗分野吳楚地
一名星渚一名匡廬廬山在府西北二十里世傳

周武王時匡俗兄弟七人結廬隱居於此故名匡廬道書爲第八洞天山有五老峯香爐峯康王谷秦始皇并吞六國楚康王避難居此故名廬山有東林西林東林僧慧遠主之西林慧永主之金得道高僧也元辰山在都昌縣西四十里道書爲五十一福地蘇耽曾居此修煉鉄船峯在廬山世傳許旌陽與吳猛乘鉄船二龍挾行住此石鏡峯在府西二十六里有一圓石懸崖明淨照人見影彭蠡湖在府東南一名鄱陽濶四十里長三百里西

接南昌東抵饒州北流入于江白鹿洞在五老峯
下唐李渤與兄涉隱此落星湖在彭蠡湖西北陳
王僧辯破侯景落星灣卽此幸靈晉時有道者建
昌人

九江府西界湖廣武昌府興國州北界湖廣黃州
黃梅縣禹貢荆揚二州之境天文斗牛分野吳楚
地晉名潯陽隋名九江左匡廬右江湖陸通五嶺
勢拒三江廬山在府城南二十五里大孤山在府
城東南彭蠡湖中四面洪濤屹然獨聳上有神祠

小孤山在彭澤縣北九十里歐陽修云九江有大
小孤山江側有彭郎磯云彭郎者小孤壻也柴桑
山在府城西南九十里柴桑近栗里晉陶潛居此
潯陽江在府城北源自岷山至此下流四十里合
彭蠡湖東流入海江流九派故又號九江虎溪在
府城南慧遠送客處道書爲七十二福地之一濂
溪在府南十五里周敦頤嘗居此濂溪在瑞昌縣
南唐元結居此號瀼溪浪士

建昌府東界福建邵武府光澤縣禹貢揚州之域

天文斗分野吳楚地一名盱江一名建武麻姑山
在府城西南十里道書三十六洞天之一名丹霞
小有洞天麻姑於此山得道故名有麻姑壇唐顏
真卿有碑記盱水源出血木嶺流六十里爲盱水
又二十里爲巴溪宋李觀字泰伯盱江人

撫州府禹貢揚州之域天文斗分野吳楚地吳名
臨川宋晏殊王安石臨川人陸九淵金谿人

臨江府禹貢揚州之域天文斗分野吳楚地閤皂
山在府東六十里道書爲第三十三福地漢張天

師晉丁令威葛孝先嘗修煉于此山玉笥山在新
淦縣南六十里道書爲第十七洞天第八福地相
傳漢武帝時有玉笥降壇上因名

吉安府禹貢荆揚二州之域天文斗分野吳楚地
漢名廬陵又名螺川王山在泰和縣東八十里晉
有王子瑤修煉於此道成仙去因名王山白鷺洲
在泰和縣南惶恐灘在萬安縣西文天祥詩有此
名宋歐陽修廬陵人劉安世安福人周必大廬陵
人楊萬里吉水人文天祥廬陵人

瑞州府禹貢揚州之域天文斗分野吳楚地唐名
高安黃蘗山在新昌縣西一百里黃蘗禪師與唐
宣宗微時同觀瀑布處康樂城在府城西一百九
十里高安縣東北四里劉宋封謝靈運康樂城於
此

袁州府西界湖廣長沙府醴陵縣禹貢揚州之域
天文斗分野吳楚地一名宜春洪陽洞在今宜縣
西一十五里相傳葛洪及婁陽所居南唐宋齊丘

萬載人九華先生

贛州府東界福建汀州府長汀縣南界廣東韶州府翁源縣禹貢揚州之域天文斗分野吳楚地贛以章貢二水得名接甌閩百粵之區介谿谷萬山之阻章水源出南安貢水源出汀州贛水章貢二水合而爲一故名金精山在寧都縣西北十五里張金華女麗英不肯嫁長沙王吳芮給令鑿洞乘紫雲曰吾乃金星之精

南安府東界廣東韶州府仁化縣南界廣東南雄府保昌縣禹貢揚州之域天文斗分野吳楚地南

扼交廣西距湖湘大庾嶺在府城西南二十五里
南接南雄其上多梅又名梅嶺

湖廣古荊州地舊稱楚六千里疆土最廣

武昌府東界江西九江府瑞昌縣禹貢荊州之城

天文翼軫分野周夷王時地屬楚楚熊渠封其子

紅爲鄂王始名鄂一名鄂渚一名江夏一名武昌

南抵五嶺北連襄漢襟帶江湖控扼吳楚黃鶴山

在府城西南世傳仙人騎黃鶴過此因名有黃鶴

樓在城西南隅赤壁山在府城東九十里卽周瑜

焚曹操船處蘇軾指黃州赤鼻山爲赤壁非也鸚鵡洲在府城南跨城西大江中黃祖殺禰衡處嶸洲在武昌縣晉劉毅破桓玄處樊口在武昌縣西四里與西山相連夏口在荆江之中正對沔口夏汭水北曰沔江北之夏口名夏汭夏口城在府城西黃鶴山吳主孫權所築對岸則入沔津故城以夏口爲名夏口者夏水口也吳大帝孫權赤烏間自建業徙都武昌有宮殿遺址唐李邕江夏人仙人羅公遠鄂人

漢陽府禹貢荊州之域天文翼軫分野大別山在
府城東北漢江右禹貢內方至于大別卽此南北
之交古今必爭之地郎官湖在府城中李白與尚
書郎張謂泛沔湖改名郎官湖漢沔之水並在境
內息夫人廟在桃花洞一名桃花夫人楚莊王滅
息取夫人終年不言卽此陽臺廟楚襄王于陽臺
山夢巫山神女宋玉作高唐賦卽此
襄陽府北界河南南陽府新野縣禹貢荊豫二州
之域天文翼軫分野周爲穀鄧鄭盧羅都之地舜

封堯子丹朱于房秦漢改爲房陵唐爲房州中宗
廢居此峴山在府城南七里晉羊祜嘗登此山祜
歿襄人立碑過者墮淚隆中山在府城西北二十
五里諸葛亮嘗隱於此鹿門山在府城東南三十
里漢龐德公唐龐蘊孟浩然皮日休俱隱於此太
岳太和山在均州南一百二十里舊名峯上真武
居之改爲太和又名武當謂非真武不足以當之
也荆山在南漳縣西北八十里下和得璞玉處漢
水襄水均水俱在境內檀溪在府城西四里昭烈

騎的盧一躍而過此磨鍼澗在太白山北真武遇
老嫗磨鉄杵作鍼大悟處沉碑潭杜預沉碑處習
家池在府城南八里山簡醉處解珮渚在府城西
十里漢神女解珮贈鄭交甫處樊城鄧城穀城羅
城鄴城鄧城俱在境內春陵城在棗陽縣南三十
里有白水鄉光武生此有故宅府治西北又有夫
人城晉朱序守襄陽秦苻丕攻之序母韓氏率女
婢築此城故名宜城出美酒杜甫襄陽人

德安府北界河南汝寧府信陽縣禹貢荊州之域

天文翼軫分野古雲夢地隨州春秋爲隨國隨縣
有平林漢王莽時平林兵起與新市王匡等兵合
卽此新市在孝感縣雲夢澤在安陸縣南五十里
禹貢曰雲土夢作又司馬相如曰楚有七澤小者
名雲夢方九百里卽此雲夢二澤名鄭子國春秋
時國名蒲騷城在應城縣北三十里左傳莫敖屈
瑕徂于蒲騷之役卽此於菟鄉在雲夢縣北楚令
尹子文生處黃香香子瓊瓊孫琬江夏安陸人
黃州府東界直隸安慶府宿松縣北界河南汝寧

府羅山縣禹貢荊州之域天文翼軫分野春秋時
爲黃國楚徙邾君於此又名邾城黃岡麻城黃陂
本漢西陵縣地一名齊安形連淮楚地接雲夢北
控光蔡東峙瀟皖赤壁山在府城西北漢川門外
屹立江濱截然如壁而有赤色因名以爲曹操敗
走處非是周瑜與操遇於赤壁在武昌樊口之上
大江之南岸蘇軾誤也五祖山在黃梅縣東北三
十里卽五祖弘忍大滿禪師道場四祖山在黃梅
縣西北四十里卽四祖大醫禪師道場一名破額

山柳宗元有破額山前碧玉流句白龜渚在府城
大江之側毛寶放龜武昌邾城之敗龜載之東岸
獲免卽此竹樓在府治西北城上宋郡守王禹偁
建有記雪堂在府治東蘇軾謫黃以大雪中築堂
成繪雪四壁故名木蘭廟在木蘭山下乃古木蘭
女替父西征古樂府有木蘭詞後趙石勒時有麻
胡秋猛悍人畏之築城嚴酷晝夜不止惟雞鳴乃
息其女麻姑賢有卹民心假作雞鳴羣雞效聲衆
工乃止父覺欲撻之女懼而逃入仙姑洞修道飛

昇有麻姑崖在羅田縣東八十里相傳卽姑飛昇處

荆州府西界四川夔州府巫山縣禹貢荊州之域
天文翼軫分野春秋時爲楚郢都一名南郡一名
荆南江陵縣秦南郡之郢公安縣漢末以劉備爲
左公居此號公安石首監利二縣卽漢南郡華容
縣地荆門州古當陽地夷陵州秦伐楚燒夷陵卽
此歸州周爲夔子國東連吳會西通巴蜀南極湘
潭北據漢沔上流重鎮龍山在府城西北十五里

孟嘉落帽處紫蓋山在當陽縣南八十里道書爲
第三十三洞天黃牛山在夷陵州西九十里卽黃
牛峽謠曰朝宿黃牛暮宿黃牛三朝三暮黃牛如
故明月峽西陵峽俱在夷陵吳以步闡爲西陵督
卽此白狗峽馬肝峽空舸峽俱在歸州當陽坂在
當陽縣北一百里曹操入荊州昭烈奔江南追及
于當陽長坂昭烈棄妻子走使張飛將二十騎拒
後卽此渚宮在江陵故城東南楚建仲宣樓在荆
門州卽當陽縣城樓漢王粲登此樓作賦章華臺

在府境有二一在府城外沙市一在監利縣東北
皆傳以爲楚靈王築在監利者又名三休臺放鷹
臺在荊門州北一百二十里楚昭王放鷹之所黃
陵廟在夷陵州西黃牛峽相傳廟神嘗佐禹治水
有功屈原有姊名女嬃聞原放逐亦來歸喻令自
寬因名其地曰姊歸今歸州舊名姊歸昭君村在
歸州東北四十里昭君生此息壤在府境山海經
鯀竊帝之息壤以湮洪水伍員楚監利人申包胥
郢人屈原宋玉俱郢人老萊子楚人庾信楚人岑

文本江陵人唐介江陵人陸法和隱于江陵百里洲敗任約破侯景有道術異人

岳州府禹貢荊州之域天文翼軫分野秦爲長沙郡地劉宋爲巴陵宋爲岳陽左洞庭右彭蠡沅湘衡岳接其前漢沔荆峴帶其後君山在府城西南十五里洞庭湖中一名洞庭山狀如十二螺髻山海經云洞庭之山帝之二女居之蓋堯女湘君嘗居之故名道書爲第十二福地天岳山一名暮阜山在平江縣北九十里夏禹治水至此道書爲二

十五洞天山有紫陽觀太浮山在澧州西南一百
三十五里跨石門武陵桃源三縣相傳浮丘子學
道浴丹之所巴丘山在府城南亦名巴蛇塚羿屠
巴蛇于洞庭積骨爲丘故名酒香山在君山山上
有美酒飲者卽爲仙漢武帝得此酒爲東方朔竊
飲卽此每春時往往聞酒香尋之不得其處洞庭
湖在府城西南沅漸辰敘酉澧濱湘九水皆合於
此故又名九江青草湖北連洞庭南接瀟湘東納
汨羅每夏秋水泛與洞庭爲一水涸則此湖先乾

青草生焉故名柳毅井在君山又有柳毅祠唐遇
龍女傳書卽此岳陽樓在府治西南卽城西門樓
也下瞰洞庭呂仙三醉于此范仲淹有記黃陵廟
在瀟湘之尾洞庭之口祠舜二妃者與君山廟爲
二處與黃牛峽黃陵廟又不同

長沙府東界江西袁州府宜春縣禹貢荊州之域
天文翼軫分野又名湘東又名三湘南以五嶺爲
限北以洞庭爲界鷺羊山在府城北二十里成少
卿昇仙之所仙壇丹臺在焉七十二福地之一洞

陽山在瀏陽縣西北六十里卽道書爲第二十四
洞天唐孫思邈煉丹於此小瀉山在醴陵縣東二
十里卽第十三洞天章仙山在醴陵縣東北七十
里道書七十二福地之一臧真人得道之所西漢
賈誼爲長沙王太傅

寶慶府禹貢荊州之域天文翼軫分野秦屬長沙
郡漢屬零陵郡三國吳置邵陵郡接九疑之形勝
控三湘之上游呂仙遺跡在府城中宋賈宗奭倅
郡呂仙自稱回處士來磨鏡畱詩而去

衡州府南界廣東廣州府連州禹貢荊州之域天文翼軫分野漢初屬長沙國又分屬桂陽郡一名湘東一名衡陽一名衡山襟帶湖湘控引交廣衡山在衡山縣西三十里五岳之一是爲南岳寰宇記云宿當翼軫度應機衡故曰衡山山有岫嶁峰有玉牒禹案其文以治水祝融峰位直離宮以配火德乃祝融君游息之所道書爲第二十四福地朱陵洞道書第三洞天唐李泌遇懶殘於衡岳寺杜甫游衡山卒于來陽縣岫嶁峰又有禹碑禹治

水登而祭之因夢玄夷使者遂獲金簡玉字之書
得治水之要晉南岳夫人魏華存於此山得道冲
舉

常德府禹貢荊州之域天文翼軫分野商周時爲
蠻蛋所居又名武陵左包洞庭之險右控五溪之
要綠蘿山在桃源縣南十五里道書爲第四十二
福地杕源山在杕源縣南二十里西南有杕源洞
一名秦人洞晉太元中武陵人曾入桃源遇避秦
人後劉子驥聞而欣然欲往未果病終陶潛作記

有詩或云武陵漁人姓黃名道真鼎口水在龍陽
縣東北昔有神鼎出其間宋改朗州爲鼎州葉少
蘊述桃花源今在鼎州以此丹砂井在臨沅縣人
飲井水世代壽考見抱朴子舜時善卷武陵人善
德山以此得名屈原楚人黃歇黔中人黔中秦郡
名朗州刺史李翱參藥山師如何是道師以手指
上下曰會麼翱曰不會師曰雲在天水在瓶翱遂
贈以詩曰煉得身形似鶴形千株松下兩函經我
來問道無餘說雲在青天水在瓶朗州唐州名

辰州府西界貴州鎮遠府禹貢荊州之地天文翼軫分野本古蠻夷地一名沅陵一名盧溪一名酉陽地連溪峒俗雜巴渝好鬼信巫刀耕火種大酉山在府城西北四十里道書爲第二十六大酉華妙洞天小酉山在府城西北五十里山下有石穴其中舊有書千卷相傳避秦者隱此酉水沅水辰水並在境內水經云武陵有五溪古龍標城在沅州城南五十里唐王昌齡左遷龍標縣尉李白送之以詩聞道龍標過五溪卽此段文昌子成式宦

遊至辰著酉陽雜俎

永州府西界廣西桂林府全州南界廣西平樂府
富川縣禹貢荊州之域天文翼軫分野春秋戰國
爲楚南境漢名零陵晉名營陽南接九疑北連衡
岳控制百越映帶三湘九疑山在寧遠縣南六十
里九峰相似望而疑之故名舜南巡嘗登此山上
有舜廟斑竹岩在道州南五十里舜葬九疑二妃
從至此以手拭淚痕把竹遂成斑竹今名湘妃竹
湘江在府城北十里源出廣西興安縣陽海山流

經郡界至湘口與瀟水合水至清十丈見底舜二妃因從舜至此死爲湘水之神瀟水在府城外源出九疑山南流至三江口東北與沱水合又東北流至湘口會于河愚溪在府城西一里舊名冉溪柳宗元改爲愚溪愚溪之上買小丘爲愚丘浯溪在和陽縣南五里流入湘江唐元結自道州歸愛其山水因家焉濂溪在道州西二十里周敦頤所居鉅鰲潭在西山之西冉水南奔流至此潭柳宗元有記七泉在道州東元結自稱漫郎故七泉有

一名漫泉帝舜陵在九疑山司馬遷云舜南巡崩
於蒼梧之野歸葬於零陵之九疑有庠墟在零陵
縣窮崖絕徼舜封象處息壤在府城南龍興寺東
北陬有堂堂之地隆然而起狀若鵠吻色若青石
不可夷鋪鋪者卽死甘茂盟息壤卽此元結爲道
州刺史人稱元道州柳宗元謫永州司馬品題永
之山水

沔陽州禹貢荊州之域天文翼軫分野漢爲江夏
之竟陵縣地唐詩竟陵煙月似吳天雲夢二澤在

州城東漢有雲杜縣屬江夏郡在竟陵縣西北唐
陸羽竟陵人著茶經

安陸州禹貢荊州之域天文翼軫分野漢爲雲杜
縣一名郢中櫟木山在州城東楚武王伐隨出師
心蕩至櫟木而卒卽此漢江在州治西上至襄陽
七百里下至沔陽七百里自此經石城西南至沔
陽漢陽入于江白雪樓在州治石城西下臨漢江
宋玉對楚襄王郢中歌陽春白雪卽此蘭臺在州
治東楚王與宋玉遊於蘭臺清風颯然而至王披

襟當之玉作風賦卽此

靖州西界貴州黎平府南界廣西柳州府融縣禹
貢荊州之域天文翼軫分野秦爲黔中郡地漢武
帝時屬牂牁郡湖南邊鄙溪峒險阻靖州志牂牁
武溪之間荆楚西南百蠻衿喉之地辰沅寶武之
藩籬

郴州東界江西吉安府龍泉縣南界廣東韶州府
乳源縣禹貢荊州之域天文翼軫分野楚長沙屬
地項羽徙義帝都郴卽此漢初于郴置桂陽郡又

名郴江以郴江水而名引衡岳而帶九疑扼交廣
而控湖湘靈壽山在州城南二十里出靈壽木可
爲杖漢平帝以賜孔光蘇耽郴人道成別母仙去
後嘗乘白鶴來止郡城樓上

施州衛軍民指揮使司禹貢荆梁二州之域天文
翼軫分野春秋爲巴國之界秦屬黔中竹王祠在
衛城東南卽夜郎侯祠也女子得嬰兒于水濱三
節竹中養之長而材武自立爲夜郎王以竹爲姓
名爲竹王施州本夜郎牂牁地

永順軍民宣慰使司禹貢荊州之域天文翼軫分
野古蠻夷地秦屬黔中唐名靈溪

保靖州軍民宣慰使司禹貢荊州之域天文翼軫
分野蠻夷之俗短裙椎髻花衣帶刀漁獵淫祀刀
畊火種

福建古閩越地

福州府北界浙江温州府平陽縣禹貢揚州之域
天文牛女分野漢初封無諸爲閩越王都此秦名
閩中晉名晉安唐名長樂東帶滄溟南望交廣北

睨淮浙閩中八郡延建汀邵號上四郡其地溪山
險阻福泉漳興號下四郡其地坦夷九仙山在府
城東南隅世傳何氏兄弟九人於此登仙故名又
九域志越王無諸重九日嘗宴於此大石尊尚在
山上烏石山在府城西南隅與九仙山對峙越王
山在府城內北隅卽越王無諸舊城丁戊山在府
城東霍童山在寧德縣北七十里神仙霍童所居
洞天記所謂霍林洞天是也大姥山在福寧縣東
北望海堯時有老母以染藍爲業得九轉神丹乘

九色龍而仙去漢武帝名曰大姥山閩王封爲西
岳螺江在府城西北三十里閩人謝端得一大螺
如斗螺中出一美姝曰我天漢中白水素女天帝
遣我爲君具食今去畱殼與君端用以居糧其米
常滿故名

泉州府禹貢揚州之域天文牛女分野一名清源
一名溫陵近接三吳遠連二廣清源在泉山之巔有
上下二洞上洞名純陽後有石室宋裴道人仙蛻
之所號蛻骨岩下洞名紫澤有蔡如金真人祠金

栗洞在紫帽山之陰相傳唐元德真人鄭文叔居之時泉人有客洛陽者遇一羽衣寄書與文叔旣歸授書遺以粟米八升還家視之金粟也宋寧宗御書金粟之洞四字刻石晉江在晉江縣治南晉南渡衣冠士族避地者多沿江以居故名洛陽江在晉江縣南二十里發源惠安縣至此入海唐宣宗嘗微行覽山川勝槩有類吾洛陽之語因名江上有洛陽橋一名萬安橋宋郡守蔡襄建建橋時爲海神佑助其事大奇襄自有記唐秦系會稽人

天寶末避亂客南安縣隱于九日山改爲高士峯
建寧府北界江西廣信府上饒縣禹貢揚州之域
天文女分野吳名建安又名建溪武夷山在崇安
縣南三十里道書爲第十六洞天列仙傳錢鏐二
子名武夷居此因名有武夷君宴曾孫及控鶴仙
人事爲七閩羣山之冠洞宮山在政和縣東南道
家爲第三十七福地相傳古有魏虞二真人於此
成道因號魏虞洞天朱熹本婺源人父松爲九溪
尉松亡熹年十四依劉子羽寓居崇安又徙建陽

胡安國安國弟子寅季子宏俱崇安人蔡元定建
陽人真德秀浦城人白玉蟾瓊州人嘗栖武夷山
延平府禹貢揚州之域天文牛女分野又名劍浦
劍津在南平縣治東建寧邵武二水合流之所晉
雷煥得二劍于豐城以一與張華畱一自佩華死
失劍所在其後煥子佩劍渡延平津劍躍入水化
爲二龍去故名宋楊時將樂人羅從彥劍浦人李
侗劍浦人

汀州府西界江西贛州府瑞金縣南界廣東潮州

府程鄉縣禹貢揚州之域天文牛女分野

興化府禹貢揚州之域天文牛女分野一名莆陽
壺公山在府城南二十里昔有人遇老翁於此忽
見宮闕似非人間翁曰此壺中日月也因名木蘭
山在府城西南二十五里下有木蘭陂九仙山在
仙游縣東北四十五里世傳何氏兄弟九人於此
得仙山下有湖九人各乘一鯉魚冲舉故名九鯉
湖湖之右有九仙宮後人於此禱夢甚著靈異蔡
襄仙遊人至今有蔡端明故居襄官至端明殿學

士人因稱之

邵武府西界江西建昌府新城縣北界江西廣信府鉛山縣禹貢揚州之域天文牛女分野一名昭武一名樵川七臺山在府城東南一百里跨汀延邵三郡上有七臺越王臺在府城西越王無諸遊獵之所宋李綱邵武人謚忠定府城外有李忠定祠

漳州府南界廣東潮州府潮陽縣禹貢揚州之域天文牛女分野一名清漳

廣東古百越地

廣州府禹貢揚州之域天文牛女分野春秋爲南
越地秦置南海郡後趙佗據其地漢武帝時討平
之復爲南海郡又云交州又云番禺又云羊城地
總百越山連五嶺浮丘山在府城西四十里傳爲
浮丘丈人得道之地浮丘卽羅山朱明之門戶先
在水中若浮丘然故名白雲山在府城北二十里
嘗有白雲覆其上相傳爲安期生飛昇之地番山
禺山在府城內番山在南禺山在北崖山在新會

縣南八十里海中宋末帝昺駐蹕於此爲元將所逼丞相陸秀夫朝服抱帝赴海死羅浮山在增城博羅二縣之境羅山浮山兩山相合而得名零丁洋在香山縣東一百七十里文天祥詩及之達磨井在府城中達磨給民下有黃金鑿井而得甘泉蓋有道者之權教非誑語也貪泉源出府西三十里卽晉吳隱之飲而作詩處也鮑姑井在府城內晉鮑靚女葛洪妻汲水處安期井在府城北十五里碧虛觀前慈元殿宋帝昺作于崖山以奉其母

楊太后五羊城在南海縣趙佗城在府城西

韶州府北界湖廣郴州桂陽縣界禹貢揚州之域
天文牛女分野一名始興一名韶陽唇齒江湘咽
喉交廣韶石山在府城東北八十里相傳舜南巡
登此山石上奏樂因名韶州之得名亦以此仙人
石室在樂昌縣西五里卽七十二福地之一唐張
九齡曲江人府城南有張文獻公祠府城北有張
九齡墓唐盧能新州人傳法于黃梅五祖忍大師
衣鉢在廣州法性寺號六祖

南雄府東界江西贛州府信豐縣北界江西南安府大庾縣禹貢揚州之域天文牛女分野一名浚江一名保昌大庾嶺在府城北八十里以嶺多梅故又名梅嶺張九齡開路與江西南安府接

惠州府北界江西贛州府龍南縣禹貢揚州之南境天文女分野一名龍川一名海豐一名博羅羅浮山在博羅縣西北三十里與增城接乃道書十大洞天之一昔有一山浮海而來傳于羅山合而爲一故曰羅浮唐軒轅集博羅人隱居羅浮山

潮州府北界福建汀州府上杭縣禹貢揚州之域
天文牽牛分野唐名潮陽鱷溪在府城東有鱷魚
爲害刺史韓愈爲文驅之鱷徙六十里韓文公廟
舊在金山蘇軾有碑文

肇慶府西界廣西梧州府蒼梧縣禹貢揚州之南
境天文牛女分野古百粵地又名端州火畊水耨
椎髻跣足以雞骨占吉凶以巫鬼當醫藥石室山
在府城北六里南北有二門號爲神仙下都唐李
邕作記鐫石六祖故居在新興縣縣東南有夏院

乃六祖禁足之地

高州府北界廣西梧州府岑溪縣古越地天文牛
女分野漢爲合浦郡地三國吳爲高涼潘山在府
城東上有仙坡相傳晉永嘉中羽士潘茂名嘗于
此采藥煉丹茂名縣以此得名高涼山在電白縣
西四十里羣山森然盛夏如秋故名郡名亦以此
廉州府西界廣西上思州北界廣西南寧府橫州
古南粵地天文翼軫分野秦爲象郡地漢爲合浦
郡吳爲珠官郡唐貞觀中改爲廉州因郡有大廉

洞故名瀕海而郡鑿山爲城地無耕稼所資珠璣
珠母海在府城東南八十里巨海中卽古合浦也
廉江在府城北三十里卽合浦江欽江在欽州東
源發洪牙山南入于海分茅嶺在欽州西南三百
六十里漢馬援征交趾立銅柱其下與之分界

雷州府古粵地天文牛女分野一名雷陽地在炎
荒海通閩浙雷公廟在府城西南八里昔鄉人嘗
造雷鼓雷車置廟中爲雷神取去

瓊州府古粵地天文牛女分野漢名珠崖唐名瓊

山又名瓊瑯郡在大海之中宋蘇軾任伯雨李綱
趙鼎胡銓並謫居於此海中四州瓊崖儋萬隔絕
中州炎荒僻壤也

廣西古百粵地漢爲荆交二州地

桂林府東界湖廣永州府道州北界湖廣寶慶府
武岡州禹貢荊州之域天文翼軫分野戰國時爲
楚粵之交秦名桂林吳名始安又名八桂東控嶺
海右扼蠻荒桂山在府治東北獨秀山宋始安太
守顏延之讀書其中伏波山在府治東北有馬伏

波試劍石湘灘二江源出海陽山流五里分爲二
南爲灘水又名桂江漢討南越戈船下瀨將軍出
零陵下灘水卽此行二百里合癸水至府城下合
相思江入梧州界北爲湘水宋范成大云桂山之
奇宜爲天下第一千峰旁無延緣平地崛然特立
玉笋瑤簪森列無際其恠且多如此誠爲天下第一
一峰蠻岩洞甚多今不悉載

柳州府古百粵地天文翼軫分野漢屬鬱林郡陳
名象郡唐名龍城表裏顙嶠控扼番洞檳榔爲聘

鷄骨占年緝麻不蠶屋必架板真仙岩在融縣東
五里仰視高遠青白錯雜靈壽溪貫串中出玲瓏
清嚮如環珮聲中有白石巍然如天尊象名老君
洞宋咸平中改爲真仙岩頒太宗御書百二十軸
藏于內張孝祥磨崖大書天下第一真仙之岩柳
江在府城南門外一名潯水源出懷遠縣流經象
州至廣州界入海柳宗元于江上種柳作詩柳州
之得名以此水大藤峽水在武宣縣東源出潯州
羅池在府城東柳宗元有祠名羅池廟宗元與人

言曰吾棄於時而寧與若等好明年吾將死
死而爲神後三年爲廟祀我及期而死三年孟秋
辛卯神降于州之後堂州人爲立廟羅池廟成大
祭過客李儀醉酒慢侮堂上得疾扶出廟門卽死
亦靈矣語出韓愈碑文

慶遠府古百粵地天文翼軫分野漢爲交趾日南
二郡唐詩淚盡日南珠卽此一名龍水一名宜陽
黃庭堅謫宜州卒

平樂府東界廣東廣州府連山縣禹貢荊州之域

天文翼軫分野古百粵地一名昭潭居蒼梧始安
之間清湘九疑犬牙相入靜梧灘瀧至此中分臨
賀嶺在賀縣境卽五嶺之一秦南有五嶺大庾始
安臨賀桂陽揭陽是爲五嶺昭潭岡在府城東二
里昭州以此得名灘江在府城南平樂溪在府城
東二里流至昭潭合灘江平樂縣以此得名
梧州府東界廣東肇慶府封川縣南界廣東高州
府信宜縣禹貢荊州之域天文牛女分野古百粵
地一名蒼梧地總百粵山連五嶺火山在府城南

隔江二里山上有光如火每三五夜一見正對東
門外一里水井水甚甘冽元結曾飲之作漫泉銘
都嶠山在容縣南二十里道書爲第二十洞天勾
漏山在北流縣東北十五里岩穴勾曲穿漏故名
山有寶圭洞卽道書第二十二洞天葛洪求爲勾
漏令煉丹卽此楊妃井在容縣西唐楊貴妃嘗飲
此水楊妃容州蒼寧縣零陵里人父維母葉氏生
妃有異質都部署楊康求爲女時楊玄琰爲長史
又從康求爲女携歸京師進入壽王宮玄宗召爲

貴妃綠珠井在博白縣西雙角山下梁氏女有美
姿容石崇爲交趾採訪使以珠三斛買之梁氏之
居舊井存焉汲飲者必誕美女山下有一水流合
容江人亦呼爲綠珠江宋秦觀貶雷州放還卒于
藤州今藤縣以藤江得名

潯州府古百粵地天文翼軫分野秦爲桂林郡地
漢屬鬱林蒼梧二郡梁名桂平唐名潯江白石山
在府城南六十里有岩洞卽道書第二十一洞天
通容縣勾漏洞葛洪往來其間三國陸績爲吳鬱

林太守罷歸無裝舟輕取石爲重大稱其廉號禁林石

南寧府南界廣東廉州府欽州禹貢揚州之西南境天文翼軫分野百粵地晉名晉興唐名朗寧內制廣源外控交趾馬退山在府城北十五里柳宗元記云是山萃然起於莽蒼之中馳奔雲矗亘數百里云云崑崙關在府城東崑崙山宋狄青破儂智高於此

太平府東界交趾古南粵地漢屬交趾郡晉以來

夷獠居之唐爲羈縻州隸邕州都督地號麗江

田州府古百粵地漢屬交趾郡

思明府古百粵地漢屬交趾

思恩軍民府古百粵地漢屬交趾

鎮安府古北粵地漢屬交趾郡泗城州古百粵地

漢屬交趾郡利州古百粵地奉議州古百粵地向

武州古百粵地都康州古百粵地龍州古百粵地

江州古百粵地思陵州古百粵地上林長官司安

隆長官司古百粵地已上並西南夷荒服蠻徼羈

縻而已

雲南古梁州之南境爲炎徼夷地漢置益州郡領於益州部刺史自唐至宋爲蒙氏段氏所據至我朝始入版圖

雲南府禹貢梁州之界天文井鬼分野周以前爲徼外西南夷棘鳩獠獠裸毒獠罽烏蠻所居地楚莊躋略地西至滇池因王其地號滇國漢武帝遣將臨滇滇王舉國降遂置益州郡一名滇國一名滇池接吐蕃際黔巫不鞍而騎善用矛劍椎髻編

髮勇捷好鬪此自舊俗今漸趨聲名文物矣碧鷄
山在府城西南三十里漢宣帝時方士言益州有
金馬碧雞可祭祀而致遣王褒往祀至蜀而卒滇
池在府城南一名昆明池合盤龍江黃龍溪水匯
爲此池漢武帝於長安西南穿昆明池象之以習
水戰卽此諸葛營在宜良縣南小石嶺諸葛亮南
平孟獲嘗營於此又有諸葛碑

大理府禹貢梁州之界天文井鬼分野古哀牢夷
唐開元間號爲南詔點蒼山在府城西高千餘仞

有峰十九蒼翠如玉西洱海在府城東古葉榆河也源自鄧川合點蒼山之十八川而匯于此形如人耳

臨安府禹貢梁州之界天文井鬼分野古句町國漢屬牂牁郡一名通江一名建水一名秀山北抵潞江西連楚雄南隣交趾爲雲南極邊

楚雄府禹貢梁州之界天文井鬼分野一名威楚潞江府東界廣西府彌勒州禹貢梁州之界天文井鬼分野古西南夷

蒙化府古西南夷地

景東府古柘南也唐時蒙氏爲銀生府舊爲濮落
雜蠻所居元討平之隸威楚荒僻之地不通漢書
惟用緬字

廣南府東界廣西泗城州西界廣西府維摩州儂
智高之裔居此

廣西府禹貢梁州之界古滇國東南境東瞰廣西
南拒交趾

鎮沅府古西南極邊地

永寧府東界四川行都司鹽井衛地接吐蕃
順寧府本蒲蠻地名慶甸

曲靖軍民府南界廣西府北界四川烏撒軍民府
禹貢梁州之界天文井鬼分野

姚安軍民府本滇國地

鶴慶軍民府東漢爲永昌郡西北境

武定軍民府禹貢梁州之界天文井鬼分野古滇
國地

尋甸軍民府古滇國地昔棘刺蠻居此

麗江軍民府禹貢梁州之界天文井鬼分野漢爲越雋益州二郡地

元江軍民府古西南夷極邊之境

北勝州唐貞元中南詔異牟尋始開其地蒙氏名其地曰善巨馬龍他郎甸長官司者樂甸長官司瀾滄衛軍民指揮使司並蠻夷地金齒軍民指揮使司禹貢梁州西南徼外地古哀牢國金齒繡面此蠻俗也以金裹兩齒曰金齒刺文其面曰繡面後諸軍民府司並諸蠻之地總之所謂西南夷也

禹貢所不載先王所不臣而今並入我版圖奉我
正朔 本朝之威德遠矣

貴州本西南夷羅施鬼國貴州宣慰使司西界四
川烏撒軍民府南界廣西泗城州北界四川播州
宣慰司禹貢荆梁二州之南境天文參井分野本
西南夷地雲南之西四川之南廣西貴州俱西南
夷俱可稱牂牁夜郎烏蠻等名夜郎國實在四川
瀘州南播州貴州東阻五溪西距盤江蜀西藩屏
滇南門戶思州府東界湖廣辰州府沅州楚爲黔

中地地連溪洞俗染蠻夷刻木爲契祭鬼弭災雞
卜瓦卦以占吉凶思南府西界四川播州宣慰司
北界四川涪州彭水縣禹貢荊州荒裔舊屬黔中
牂牁要路蠻獠雜居言語各異鎮遠府禹貢荊州
南境沿邊溪洞習俗質野石阡府西界四川播州
餘慶長官司禹貢荊州南裔刻木爲記不事文墨
銅仁府北界四川邑樓長官司禹貢荊州南裔天
文星分野古溪蠻地東連麻陽西接思南北控苗
蠻南抵思州黎平府東界湖廣靖州南界廣西柳

州府羅城縣北界湖廣辰州府沅州禹貢荊州荒
裔天文翼軫之餘地在夜郎之旁漢屬牂牁郡普
安州西界雲南平夷衛南界雲南廣南衛北界貴
州宣慰司禹貢梁州界天文井鬼分野古夜郎地
又名牂牁永寧州南界廣西泗城古荒服地有關
索嶺鎮寧州古荒服地安順州古荒服地已下安
撫軍民諸司並荒服地皆所謂西南夷也

夫古今之所以欲知輿圖形勝者大要不過四端
帝王定鼎也英雄經略也將士戰陳也高逸棲隱

也帝王定鼎欲據形勝占王氣扼險要制萬國立
子孫萬世不拔之基至重且大也周都洛邑天地
之中陰陽之交會道里之適均王帛攸同筐篚輻
輳信王者之都也然議者以爲洛邑廣衍無名山
大川之限四面受敵有德則易以興無德則易以
亡故漢婁敬說高祖從洛陽徙都關中關中金城
千里天府之國左殽函右隴蜀拔山帶河四塞以
爲固卒然有急百萬之衆可立具阻三面而守獨
以一面東制諸侯豈惟婁敬張良亦言之當時持

別議者又言周王數百年秦二世卽亡安在其爲
金城天府此亦似有理哉其後符姚都秦秦之山
川險要非有改於昔也而皆不如漢之長久推斯
以譚帝王之保世永業或者有不盡由于定鼎者
耶漢唐都關中當時土風物產盛於西北江淮吳
越尚屬邊夷故都秦雍爲便乃今則雍州瘠荒無
復往時長安之盛而東南風氣日開生齒日繁貨
產聚于江海財賦甲於天下若都關中則僻在西
垂地阻關隴東南遼遠運道不通吾未見其便也

建康王者之都昔人謂鍾山龍蟠石城虎踞鬱蔥
王氣自秦時鑿之厭之亦東南一大都會然僻在
江左難以經營中原六代偏安皆不能混一天下
是則然矣而我太祖實自金陵混一區宇則知
六朝之偏安良由人主之無遠略非地形限之也
北平雖稱天險世淪胡虜俗染腥羶若非我成
祖始封於燕萬年定鼎未必決于此地自成祖
徙都都城雄堅皇居壯麗北控沙漠南帶青徐
山川增奇基業永固烈矣盛矣然愚竊以爲邊界

堡塞密邇虜庭胡騎長驅朝發夕抵居近虎穴地
隣龍湫當其全盛虜貢市納款不敢生心萬一奸
謀叵測能無剥床蕭牆之憂乎大都帝王有道綱
紀修明威令宣布則雖奮迹徒步不階尺土可以
肇造鴻基僻處遐陬全無形勢可以彈壓疆宇不
然揭竿斬木可摧殺函攀樹綠崖可度蜀道險不
足恃也歷代帝王其祖宗以徒手取天下而其子
孫往往以天下輸他人古云在德不在險盡之矣
英雄經略昔吳王夫差擁吳都茂苑之盛擅江海

魚鹽之饒控水犀魚腸之利統舳舻舳舳之師國
富兵強雄視天下越王句踐敗亡之餘僅存殘喘
甲楯五千棲於會稽此其大小強弱之形相去何
如也卒之夫差以奢淫亡吳句踐以憂勤霸越兵
力果足恃乎秦始皇仗雍州形勢併吞六國統一
四海自謂千萬世無窮之業一夫作難而七廟隳
沙丘之骨猶未寒也項羽獨據徐沛江淮東南要
地置沛公於西蜀限以巴江阻以棧道西楚霸王
之業屹於泰山而四維之矣然而蜀兵一起還定

三秦席捲天下漢龍興而楚猴滅何其反掌也吳
王濞當天下精兵處采山爲銅煮海爲鹽享國富
饒連合七國其鋒不可當亞夫奮臂一呼諸國散
走奚翅發蒙振槁哉乃若熊罴之開楚也栢翳之
啓秦也泰伯之肇吳也諸葛之治蜀也竇融之保
河西也劉虞之撫幽州也王猛之理符秦也張軌
之據西涼也李雄之君蜀漢也公孫之守遼東也
錢鏐之總吳越也皆斬荆棘披葦露立綱紀布恩
信化輿涂爲樂土易弱邦爲疆國功伐被於當時

聲名垂於後世豪傑經營何擇於地乎開天闢地
疆理九州其最大者莫如神禹四乘所至無遐不
到無危不涉無幽不探無險不捫山川郡國輿圖
扼塞悉了了而羅之胷中作爲禹貢一書犁然指
掌豪傑有志經略烏可不考鏡地形土風括其梗
槩也大抵西北風土碩厚其人物敦大而淳朴東
南風土清弱其人物韶秀而輕俊此其大略也秦
晉雄險其人壯悍燕趙疆大其人慷慨齊魯龐厚
其人椎樸河洛中土其人冲和巴蜀桀阻其人峭

利江淮澎湃其人儁標徐沛戰場其人剛猛荆楚
廣腴其人迅快三吳秀潤其人華浮越國吳風其
人近靡豫章瘠土其人儉陋七閩饒沃其人臞柔
交廣炎州其人漫散滇南遼遠其人閑適貴竹僻
絕其人質野蓋土風從古如此乃近代以來地氣
稍變燕齊秦晉之間向稱龐厚近則朴漸趨華拙
漸趨巧脂韋妙捷有東南人不能窺其藩籬者而
東南間或有直慙西北風又不可以執一論也晉
之平陽蒲坂秦之雍岐經堯舜后稷公劉之後今

不復見有帝王先聖風而咸陽渭水亦無復秦漢
舊時富盛洛邑天地之中今其人民亦不見冲和
秀雅獨以椎勝耳齊魯仲尼之鄉文學其天性然
太史公嘗言之今何寥寥也燕趙自荆卿高漸離
後多慷慨悲歌士近亦無有而吳越在商周時號
爲斷髮文身蠻荒之地不與中國冠帶之盟會今
詩書文學遂以彬彬秀甲天下特嫌其文勝而稍
不實耳聞楚文學頃亦有吳越風殊不似當時所
稱蠻俗固知風氣有時而開習俗有時而變也沛

礪徐淮間丁 國家承平久不用兵其人不習戰
鬪勇悍沉鷙之氣亦減而浙自嘉靖時被倭患慘
酷士卒稍稍練習武事今遂稱浙兵吳從倪瓚顧
瑛文徵明祝允明以來詩畫器玩清雅風調甚盛
閩自考亭豫章自新建過化士大夫往往好譚理
學乃知前人風烈近則漸摩遠則湮散自然之勢
也善爲治者因勢而利導之故風土不可不知也
將士戰爭必相地形險易某處平行可以布陣成
列某處深阻可以藏機設伏某處高阜可據成建

鉤之勢某處雄壯可守立堅壁之形某處爲首尾
當乘要害以制敵人某處爲腹背須置奇兵以防
衝突某水通某川可以順流可以決灌某路達某
地可以潛度可以直抵某處之人長於某技勿以
我短而犯其長某處之人短於某技宜以我長而
挫其短荀卿曰齊之技擊不可以遇魏之武卒魏
之武卒不可以遇秦之銳士秦之銳士不可以當
桓文之節制桓文之節制不可以敵湯武之仁義
言兵以地殊也鼂錯曰上下山阪出入溪澗險道

傾仄且馳且射風雨罷勞饑渴不困此匈奴之長
技也平原易地輕車突騎勁弩長戟射疏及遠下
馬地鬪劍戟相接此中國之長技也言技以俗別
也陸戰之能南人不如北人故王玄謨敗於滑臺
水戰之利北人不如南人故曹操困於赤壁三面
可守一面制人故秦人卒併六國出可乘勝入可
阻險故漢高昭烈卒成帝基不徑入關而先據陳
畱就積粟酈生所以佐王業將渡河津而略南陽
下宛郡張良所以開帝基西築甬道屬大河以拒

楚軍東屯鞏洛守敖倉以示形勢四百年炎祚規模宏遠矣陳餘不阻井陘之險故韓信得斬餘於泜水吳王不守武關之隘故亞夫得破吳於穀澠陳豨不據邯鄲阻漳水故軍敗代地英布不取吳楚併齊魯故困斬西蜀漢不塞陰平之口故後主降於鄧艾梁人不守采石之渡故武帝困於侯景戰陣之在先據地形也尚矣是以蕭何甫入關而首收圖籍知天下戶口阨塞識先衆人功高諸將以此也高逸棲隱或不受國君之徵聘養志山林

或脫迹塵世之浮榮專修性命或借山川之映發
抒文藻而品題故大禹有山海經周人有越絕書
酈道元有水經東方朔有十洲記漢人有三輔黃
圖王子年有五山記周處有風土記王存有九域
志杜光庭有洞天福地記真誥有金壇林屋記盛
弘之有荊州記常璩有華陽國志徐靈期有南嶽
記程大昌有雍錄近世有方輿勝覽一統志名山
記由赤縣神州以及大荒之外考究載錄之詳矣
一丘一壑石隱終身者足跡不必徧九州居室不

必託五岳昔人譏支道林云不聞巢由買山而隱
是也然無論名山洞府通都大邑遐陬僻壤但有
聖賢豪傑名人高士孕育棲託者故宅舊蹟往往
歷千百世不可磨滅而古今鴻章佳什勒石摹崖
流輝山川照耀天地者亦若爲神靈呵護垂之無
窮一瓢一笠蹤跡所寄不過名山片石耳而後人
必指之曰某山某高士之所棲隱也某山某名賢
之所經遊也某山某文人之所題品也而栖真修
道食霞絕粒之人亦多擇洞天福地而居之抱朴

子謂小山僻地乃妖邪所憑恒妬人成道而思燒
害之惟名山洞府正神掌治好助善人護法衛道
故修道者所宜隱處洪崖居西山匡俗居廬阜廣
成居崆峒浮丘子晉居嵩高馬明生居東岳龍威
丈人居洞庭魏王子騫居武夷真武居太和司馬
季主居委羽張輔漢居皂閣皇初平居金華王瑋
玄居林屋羨門子居蒙山沈文泰居九疑周義山
居金庭王褒居陽洛何侯居蒼桐王遙居馬跡葛
由居綏山平仲節居括蒼茅真陶都水居句曲王

子年居倒獸劉綱居四明許遠遊居懸雷蕭子雲
居玉笥孫登居蘇門徐靈期居衡山單道開葛稚
川軒轅集居羅浮孫思邈居峨眉侯道華居中條
羅公遠居青城間丘方遠居大滌鍾離雲房居終
南張紫陽居王屋陳圖南居華山至人成道度世
皆有勝地神明相之上帝命之亦緣也數也夫建
都也經略也戰陣也在世之事也棲隱也出世之
事也之四者皆有資於輿圖輿圖烏可不研討也
蕭相國之收圖籍專爲治世用王子年之記五山

東方朔之記十洲陶弘景之記金壇林屋杜光庭
之記洞天福地專爲出世資合而言之者不佞也
夫出世而或抱治世之略在世而存出世之心如
是而後至人其幾乎

十子居何處劉純居四明許遜居撫州蕭子雲
居王晉孫登居蘇門徐靈期居衡山單道開葛稚
川何遜及周顒等思邈居峨眉侯道華居中條
羅公遠居青城間丘方遠居大祿鍾離雲房居終
南張紫陽居士居陳圖南居華山至人成道度世
吳而終至人共幾乎上帝命之亦緣也數也夫徒
夫出世而延齡欲世之細其世而亦出世之也故
玄監師天師此專為出世資合而言之者不列於
東玄師之時十洲圖說景之時金甌林皇林光武





